

焦太史編輯國朝獻徵錄

焦太史編輯國朝獻徵錄卷之七十六目錄

鴻臚寺

卿

施純

楊宣

羅義

齊政

周文興

魏澆

少卿

王希孟

胡侍

寺丞

錢貴

鳳陽縣志

卷之七十六 附錄

南京鴻臚寺

卿

胡森

史朝賓

金陵黃應登

全校

吳興茅元儀

錢塘徐象樞

刊行

焦太史編輯國朝獻徵錄卷之七十六目錄終

焦太史編輯國朝獻徵錄卷之七十六

鴻臚寺

卿

太子少保禮部尚書掌鴻臚寺事施純傳

實錄

施純字彥厚順天府東安縣人成化丙戌進士改翰林院庶吉士初授戶科給事中陞鴻臚寺少卿再陞本寺卿純習禮度每旦侍朝爲磬折狀甚恭又諸司奏事上是之語頗溢純請以照例易之用是蒙寵眷遂擢禮部右侍郎未幾陞尚書一旦與殷謙等八

人同加太子少保成化二十一年閏四月卒年五十
無子以例賜祭葬純長身偉然出羣類表不十數年
得驟登峻秩前此所未有也

禮部左侍郎掌鴻臚寺事楊公宜墓志銘

傳珪

公諱宣字振方世爲保定新城人曾祖敬禮祖斌父仕能俱弗仕母蘇氏公生而穎拔不羣人縣庠爲生累舉不中選嘆曰是我造詣未至也乃抵京從內翰淳安商公游學業大進遂領景泰癸酉鄉薦甲戌登進士第未幾拜河南道監察御史公剛毅有氣畧每慨然以激揚清濁爲已任英廟復辟簡黜臧否以更新治化公舉劾姦竇無所避忌風裁凜然上默重之會鴻臚寺少卿缺吏部以請卽擢公爲之凡朝

廷宴享朝賀大禮皆出職掌公修幹美辭奏對明暢
日見寵遇自餘皆不敢望也 憲宗立以公舊臣眷
注尤篤尋陞鴻臚卿滿三載進階中憲大夫賜誥褒
封父如其官母恭人辛卯冬朝廷因災變下詔修省
時荆襄叛寇剽千斤者旣伏誅戎帥械繫餘黨獻俘
於京屬官引奏公詢知徒衆有誤陷於辜者亟上章
論救大要欲重人命謹天戒辭甚婉切有 詔法曹
詳鞠以聞竟得矜宥論者服公之見云滿九載陞禮
部左侍郎仍掌寺事越二載卽上疏乞休旣歸日與
鄉舊酌酒賦詩爲樂俟游林下垂二十年而卒定弘

治丁巳十月九日也。距生洪熙乙巳六月二十九日
春秋七十有三公爲人端慤謹密居家孝友處族黨
惇睦待人一以誠所與交無不意滿者立朝號得君
公亦克自勤恪雖大寒暑風雨未嘗一日闕朝前後
蒙賞賚甚多若 御製連環詩一統志通鑑諸書之
賜尤殊恩也。計聞 今上遣官論祭復 命有司營
葬事於平公所遭亦可謂不偶矣。

鴻臚卿羅義傳

郡志

羅義山西清遠衛戍卒也革朝加兵潛邸義詣闕上書乞息兵講和又上潛邸書略曰昔日武王崩成王幼周公叔父也而輔相焉管叔流言以間王室周公誅之殷下聰明英武博通經史今之周公也宜以周公之心爲心謹守燕土則天下皆以爲周公之聖復生於今日矣又謂古之夷齊以國相讓去隱於首陽山矧聖賢欲成天下之事必先明逆順之理成敗之勢禍福之機又得天道之宜人心之安然後可殿下以藩國敵朝廷如遂其願臣實羞之書上忤旨下獄

文皇卽位義歸附以爲戶科給事中陞湖廣布政司左叅議代左叅議楊砥入爲鴻臚寺卿建文時砥督上書請敦親睦罷兵息民云

鴻臚寺卿大同齊公政慕志銘 徐 溥

公諱政字以德姓齊氏世家雲中少卽穎異入郡庠
爲弟子員學業迥出儕輩永樂丁酉試於鄉中式明
年會試辭乙榜卒業大學宣德丙午吏部從太學諸
生選爲鴻臚寺序班公在選中或謂公且登科甲公
曰此古九賓之職也懼不能稱耳卒就職己酉改鳴
贊正統丙辰九載考最擢本寺主簿仍專鳴贊事己
而連遭父母喪服闋復任己巳擢寺丞景泰壬申再
擢右少卿天順丁丑 英宗崩皇帝光復寶位知公
練達特擢本寺卿居四年以衰老乞致仕 上段詔

雷之又四年再以為請詔特令歸展墓 今上嗣位之初公年已七十有七請休致不已始賜俞允既歸二年為成化丁亥十二月十二日以疾終於正寢計 上遣官諭祭以明年某月某日葬於大同縣長安村之先塋公為人體質魁梧音吐洪亮日侍延陞而禮制習熨動無所失及年既邁恭謹愈甚故累蒙特寵眷之遂以諸生至九卿可謂嘉遇也已

宋中
如代
江山
所故
是物
外人

鴻臚寺卿江郎周先生文興傳 趙 鏜

江郎先生者江山鳳林里人也生而穎慧丰姿瀟灑
自幼時即慕李泌之爲人有異僧見而奇之曰此子
風骨不凡當是神仙中人但恐世情牽染爲顯官則
無望矣其家聞其言強爲博士弟子員從遊章楓山
先生門先生一見其文許以決科曰是無煙火氣者
遂舉正德丁卯鄉試第四人次年舉進士高等郎乞
致仕不允乃以疾告過遊海內名山凡太華終南衡
嶽匡廬遊覽殆遍歸丁內艱服闋起投比部主事尋
復以憂歸築室於江郎之鋪鼓洞終日端坐觀心定

性若將終身焉嘉靖改元奉部檄補禮部祠祭仍乞
休不允告改南尋轉稽勲郎中屢轉至鴻臚正卿即
乞致仕歸寓居府城晚年移居武林徜徉湖山日與
高僧異人爲方外交潘臬諸公慕其風者咸願出門
下侍御邢臺趙公玉泉扁其所居曰嵩寓總制胡公
梅林巡撫阮公山峰爲造高士堂以居焉先生周姓
諱文興字用賓嘗居江郎山故因以爲號年八十二
無子終於武林云論曰先生平生不喜著述亦不作
應酬文字而於道經釋典則深裁其味中年頂上結
一疋令人大棒槌之不知痛人以爲冊成之驗故僅

從者衆或曰昔人謂康節別是一般聖人若先生者
其不別是一般人品與余每謁先生見其丰神器度
真有振衣千仞之風令人鄙吝不覺都消或者之論
其然哉其然哉

鴻臚寺卿魏澆傳

魏澆直隸合肥人羽林衛籍正德戊辰進士六年任鴻臚寺左少卿十五年九年考滿陞本寺卿初通事缺人見在通事假訪保名橫行求索視利輕重爲出入嘉靖元年澆疏其弊凡選補各國通事除丁憂緣事俱不作缺其見缺十人以上及一國全缺者在外行各邊鎮巡每缺精選一人送部在京不必通行通事訪保禮部劄鴻臚寺召選真正籍貫子弟取具印信保結粘送部覆審相同再試每缺精選一人奏送該寺分派各國年深老成通事敬習如本國無人許

其自從師受業或隣邦通曉者教之一年之後同邊
方訪保到部之人通行試以夾語上者收補次者候
缺下者黜退不得稱守候多年以濫收選時勘結人
員不得以過犯頂冒之人竄入著爲令禮部覆議
詔從之歷太常寺卿掌鴻臚寺事

鴻臚少卿王公希孟墓碑

予平生有雄傑友曰獲嘉王宗哲云宗哲諱希孟號
淇東貌肥黑而健力性敏而耻自屈推事陳義已雖
未悉得他人稍啟其端卽娓娓談多奇悟弘治戊午
同予舉河南鄉試乙丑同第進士已值武皇卽位
出令唐山更賢改邢臺逆瑾方竊弄國政閣使謀校
旁午下郡縣大索賄少不厭欲中以法大者械首廷
笞次削秩遠竄吏日惟謝茲亦乘隙自潤上官涼其
艱不深咎宗哲廉白自將盡力民事又苦斷決無滯
務守郭維潔修有稱宗哲勞而病守憂自來視求他

首診治三載晉刑部主事正德庚午秋八月闕張永
害瑾權奏瑾大惡詔多官廷鞫皆錯錯索索莫敢先
發言衆促司寇乃問瑾胡爲引用鄉人瑾笑乃罵曰
汝文武大臣皆由我進何得言鄉人衆皆惛息駢馬
蔡震詰瑾考掠成獄震武人齷齪無所長一旦名聲
遍朝廷法官推宗哲謹獄詞慷慨亢朗聽者竦然由
是銓司器之太宰楊遠庵選授鴻臚少卿前未有超
級如此者遠庵方以折體越用招士出其門士亦樂
比附宗哲僅隨衆投名狀迄宰遠去位未嘗登其私
堂交一言乙亥七月二十三日以疾卒生成化乙未

八月十一日享年纔四十有一宗哲負氣忤物而數人過失指其隱弗恤人不能堪能因而改者極與厚善好強飲醉更浮白坐是得並病予與何仲默日候之疾革自恨業不遂擊膺忿厲既卒予與仲默仍請費於鄉士夫及他厚宗哲者乃得棺斂馬柳泉敬臣守大名助之葬云

鴻臚寺右少卿胡公侍墓志銘 許宗魯

公姓胡氏諱侍字承之別號棠谿應天府溧陽縣人也國初諱士真者明醫術坐累謫戍陝寧夏衛歷四世皆爲寧夏人司馬公卒賜葬陝西咸寧縣韋曲得守冢墓遂爲韋曲里人公少治書爲縣學生正德癸酉舉鄉試丁丑舉進士戊寅授刑部雲南司主事辛巳晉廣東司員外郎嘉靖壬午晉鴻臚寺右少卿甲申謫補山西潞州同知乙酉下詔獄事白奪秩編民戊戌詔復其官癸丑十二月四日考終於家距生弘治壬子十一月六日得年六十有二明年

甲寅十一月四日附葬司馬公墓次所著有蒙谿集
三卷續集一卷墅談二卷真珠船二卷清涼經一卷
傳之於世右狀所載如此云維公靈炳肇生粹敏風
賦垂髫穎慧族稱豹變之資弱冠敷揚鄉舉風輝之
覽逮過庭之服習遂遊泮以翱翔胞羅星斗之文落
筆而煙雲滿紙腹蘊經史之奧縱談而古今懸河首
薦鄉書省推額雋繼登廷對朝慶得賢仕始白雲著
火雷之剛決明垂黑索並日月之靈融式慰勤而折
獄以情體欽恤而求生於殺淮南密網解三面而仁
活千人定國高門設五刑而慶延百世陟卿禮寺佐

肅朝章寅恭贊導乎日司執度儀刑乎四裔瞻天咫尺身依斧戾之榮捧日周旋晉接 兗旄之貴叔孫制禮體統正而朝廷尊公西立朝應對諧而賓客悅無何崇祀議興嘵言訟聚公乃愼性不化恭苦遂罹賈誼少年自速長沙之責子牟忠愃常勤魏閔之懷方內咎以圖新忽外尤而作戾紛馳霜貝糾譏無端載錮囹圄控白何所公惟究心義端滿言臣罪當誅絕念邵書仰恃 皇明有赫旣而大地主春恩深玉律覆盆回照德沛金雞沐雨露之鴻私於山林而默逸於是痺躬嵌竅畢志典墳三農旣隙頌至仁於擊

壤之歌四部窮探揖往聖於蓬壺之接謝靈運放情
自適賦登山臨水以徜徉邵堯夫知命樂天咏月霖
風光而爾雅貧無僭石之蓄樂且有餘富有貫斗之
才學如不及雖古人三冬之苦八斗之雄方之恐不
能前也故其著述精研搜羅極至秦封孔壁了無遺
文汲冢湯盤條興雅道謂爲詞林之宗匠學海之鉅
儒蓋無忝焉而又天畀純孝性篤友恭故彼葵倫慎
茲肅行執喪則毀瘠越制侍養則色志無違昆季念
孔懷之休妻子翁好合之美生年華胄不染統緒之
風流投老窮居克厲貞松之志操古云居養易習亨

困移人可無其咎矣公器度深宏識見警捷剖紛刺
刺不假盡詞應變持危有同素定而乃禁不迄用卷
以還終嗚呼傷哉魯也托葬於公自髫髻伊始何天不
弔隕我良朋感交道之始終慨斯文之凋喪爰製韻
語慰公於幽

鴻臚寺寺丞錢君貴墓志銘

文徵明

嘉靖甲申錢君元抑以鴻臚丞致仕還長洲閏六年
庚寅三月四日卒年五十有九君諱貴字元抑姓錢
氏吳越武肅王之後宋有寶文閣學士諱端問者卒
官平江遂家長洲漕湖之上君曾祖玠祖迪父腴世
有隱德而腴尤業儒有間以君貴累贈文林郎太常
寺典簿母陸氏贈安人君生穎異數歲問父讀史從
傍諦聽若領解者問之卽能以意對父大奇之授以
家學年十六選隸學官始從師習舉子業不數月悉
通其義御史按試輒占高等弘治戊午中應天府鄉

三忠傳是
利公
定之
作

試益淬勵精進期取甲科既而試禮部數不中而其
名日益起從遊者日衆君質義演推必盡底裏又爲
游揚引重使皆有聞一時學者咸親附之正德辛巳
以太學生試吏部入格授太常寺典簿時方用羽流
爲太常卿少君上言秩宗之用典司禮樂統和神人
職重位尊不宜以異端參列其中又言太監蕭敬賢
陂懷譖屢遭論劾不宜在 上左右又集姦璫王振
曹吉祥劉瑾事著三忠傳上之時 上新卽位中官
有用事之漸君言隱然有所指陳人咸避之會有事
與獻帝園陵君奉詔副大臣往治禮儀禮成復命賜

白金五十兩及追崇議起君因論邊豆之數乘間有
所論列或謂非所宜言君曰吾職司事既有知不敢
不以聞禍福非所計也在太常執事節過多所建正
而操廉履慎莫或過舉既舉最當遷而君雅有歸志
遂上疏乞骸骨 朝廷以年未及不許疏再上乃遷
今官以榮其歸

南京鴻臚寺卿胡公森墓志銘 應廷育

公胡姓諱森字秀夫別號未齋自幼英特迥邁不凡
大父期公碩器幼齡送入貴官博究羣書爲文雋拔
領正德丙子鄉薦丁丑魁太學試庚辰中式尋闕越
辛巳上首策多士賜公進士出身初授南京刑部
河南司主事繼陟本部陝西司員外郎更廣西司明
察廉平寬惠信決平富民沈氏之訟父子兄弟咸輸
其情聽訟之中教化行焉察緝錢之私併得假官之
狀請託之杜摘伏神焉告訢月餘則部案累積視事
一日則囹圄幾空逮繫之釋數百皆呼青天而去繁

劇之理有仁恕焉不激不隨有學有守心存愷悌而
獄獄本於平恕志向高遠而自處拔乎流俗則見於
部堂季襄惠公之薦遂有吏部稽勲司署郎中之擢
歲在戊子率士來賓大明黜陟實難其選朝論僉同
陞公考功郎中公廣詢博訪誓心秉公於時大禮著
爲成典矢議諸臣皆就外補執政欲追前尤公爲從
容回幹士類藉以保全太僕卿楊公最時爲寧波守
以剛方忤部使被論公獨諒其不阿爲之解釋覆奏
卒以忠諫顯有省憲長等在議黜例首相欲私庇之
公竟黜之不少貸考績事竣歷轉文選司郎中明楊

側陋惟其賢不惟其類辟引善類士途爲之一清斥
罷貪庸首相爲之莫挽家宰渭涯霍公疏可證也食
陞南京太常寺少卿時有祀典明禋之疏以求無愧
於天理民彝之極其署光祿之印革厨役之濫輸省
麴孽之冗費却署官之餘金不以非專職而不事事
癸巳之秋北補太常少卿提督翰林院四夷館官階
清要士民傾心無何公妣王恭人卒以內艱去任扶
柩歸葬結廬墓側哀禮備至服闋哭奠在疚四期始
起赴京又以新於請謁忤首相補南京鴻臚寺卿公
以局閑事省減去直役時與渭涯霍公蔡泉黃公東
載散錄

郭鄒公泉亭吳公談說理學講明國是以需大用
皇上克謹天威因遇災異許令自陳三疏乞休遂得
請家食宰相尋亦被論去無幾召復相舟停潞溪請
見公輒稱病不往嗣後內外交薦皆不報繼其相者
公南官即舊比鄰也厥子竊柄遂不與通尺楮大中
丞歐陽公必進雖有特疏之薦而公高尚之志於此
決矣厥後二相果不令終人由是服公之先見躬飭
粥調藥解養封君中憲公又十餘年許躋大耋而卒
公年亦邁其哀慟居廬動必如禮營墓建祠皆親課
弗懈又聿追前季家廟之在青陽者皆修葺而拓其

基焉餘惟杜門九峰韜養自晦優游林下者凡二十
餘年而卒

南京鴻臚寺卿觀吾史君朝賓墓志銘

袁洪念

余讀楊忠愍傳咨嗟憤懣泣然涕泣不得俾刃姦兒
腹中以爲恨 世廟雖御臣嚴未始不謀於輔臣如
徐文貞調護海君瑞上怒甚卒得解忠愍之見殺嚴
氏力爲之也佐賊者仇賊所撼曲法蔑理孰知有忠
臣孰知有國家良心亡無所不至亦鄙夫恒情於時
以下僚抗上官執辭曰不可雖弗獲竟其志豈不亦
難哉觀吾史君所以無愧於人其行可述其墓可銘
也已按狀嚴氏嵩之欲殺忠愍也授指刑部侍郎王

學益文致其罪史君適以山東司員外郎署司事論
辨終日曰繼盛何罪也王知不可奪自爲律案以詐
傳親王令旨律藁成授司令署銜君痛心疾首無如
之何乃自署疏尾有楊繼盛語雖註誤心實無他惟
復一陛下憫其狂愚謫發遠戍以全好生之德等語
疏入嵩怒楊坐死而君則降職調外矣君雖左遷聲
譽自此勃勃起由泰州判官陞揚州府通判陞南京
戶部員外尋陞郎中丁母憂服闋補工部郎中管張
秋陞河南僉事陞尚寶少卿陞南大理寺丞應天府
丞南鴻臚寺卿時文貞爲元輔方欲大用君未幾而

君逝矣君以正德庚午四月二十九日生以隆慶辛未十月初三日卒卒十有六年爲今上萬曆

歲余始誌其墓中之石君姓史氏諱朝賓字應之別號觀吾其先浙之四明人元至正中有舊者避地入晉江遂爲晉江人舊生元吉元吉生恩有孝行詔

旌其門以長子盛貴封戶部郎中恩生騰騰生時泰時泰生商嘒公宏璉任金壇訓導贈鴻臚卿君之父也母包氏封太宜人贈太恭人君以嘉靖辛卯薦於鄉爲第二人丁未試春官爲南字高公所錄第一人試於廷爲二甲第四人君雅尚澹泊簡約歷爲時

俗靡態自宦所歸僦居僧寺舍車而徒宛然寒素士也孝友忠信不言而躬行居官奉法循理節冗費恤民隱卻餽遺雪冤抑所至著績薦於端簡鄭公曉曰表裏無間夷險一節稱於蔡巡撫汝楠林宗伯濂曰不飲大梁一滴水曰聽其言若呐呐不出口而胸中膽略有萬夫莫當之勇余嘗與君共事雷都蓋親親記其議論獻爲真有道氣象前輩風流不可及也詔賜諭祭鄉推賢祠君沒有餘榮焉而諸子皆彬彬守其窶貧而厲志進修福澤綿綿蓋未有涯也君嘗集自古父子兄弟言行可法者爲史氏內範行於家

又行畧

弟朝富

當肅皇帝癸丑之春楊椒山公繼盛以兵部郎上疏極言嚴氏納賂強國十事疏中有引二王語上大怒命杖之百下司寇獄來朝皇皇時余伯兄觀吾以員外郎署司事部堂則何公也問當擬何律觀吾答以奏事不以實當用此律堂翁曰更有一律可用汝試尋之次日復翁曰以員外見只有此律它無可傳者翁乃指許傳王旨一條謂用此何如觀吾爭不可時急矣延數日獄未上堂翁乃曰汝說誠是然聖怒不測與其俱斃無益不若姑徇上意以獻敵錄

待後解左堂王者嚴氏姻人也則曰司官欲徇名姑
饒我老命於是改擬詐傳王旨絞蔡成授司令署銜
兄痛憤既不可柰何乃自署本末云楊某言雖註誤
心實無他惟復 陛下憫其狂愚請發遠戍以全好
生之德數語及疏入相嵩怒楊坐歿司官降三級調
外任堂上官罰俸三月方嚴氏勢焰士大夫相見以
目不敢言及椒山事同年提舉者至一黑羊不許入
諸相問者椒山俱閉目不言獨觀吾至則張目視曰
史年兄耶多費心矣兄瀕行與楊書曰遇翁之事當
以成諍賓不歿者尤冀翁之不歿也帶罪出門望翁

自愛明明者天庶幾一悟楊復書曰此奸人腸誓不
俱生自分必死翁何苦也翁行矣天下事尚可爲珍
重珍重手書至今存調任之後達官貴人見皆噴噴
慰勞至見次相李南渠公未及展通指曰此真男兒
也遂降階延入慰籍尤至今縉紳大夫不惟不知觀
吾事并楊椒山亦或惘然王鳳洲爲楊立傳僅及郎
史君不詳其實而且沒其名可惜也余觀今之巧於
取名者稍建一言著一節晚晚以名節自負人亦爭
以名歸之雖一時遭抑旋卽償之因而負重望躋騰
仕若觀吾者一遭謫謫蕭然一州縣赴任上官無物

色之者三年盡瘁供職竟不得一引薦當時觀吏部
政楊武東公掌選以風裁自持欲收拾天下人才道
及將處之一京職以嚴氏意未解量移楊州通判及
李古冲公位冢宰李素知觀吾者乃稍遷南戶部郎
嚴氏敗諸爲所擠斥者俱蒙賜還觀吾復以河南僉
憲轉尚寶卿尋丞大理駁駁向用矣竟以無書抵政
府甯滯南都終於鴻臚散卿以沒嗚呼此誠拙之效
其視今之巧於取名者何如也

中憲大夫南京鴻臚寺卿張公朝瑞墓表

焦竑

萬曆辛卯鳳梧張公以金華守入覲太宰陸莊簡公負人倫鑒擇計吏卓異者六人請旌之公與焉當是時公廉直之聲天下莫不聞余意公必矯然有以自異者久之與公遊益聞然篤行君子也嗟乎吏不受賕常耳而世輒以自矜詡訑訑見於須面宜其一節之鮮終而入何以論於其大余以是歎莊簡之知人而公之賢爲不可及已公年六十有八以癸卯二月十一日卒明年冬十月二十六日諸子將葬公州孔

望山之原而屬表其墓余惡能辭公諱朝瑞字子猷
生敏而恪五歲知字義十三入州校嘉靖辛酉舉應
天鄉試隆慶戊辰舉進士屬州有倭警議築城公卽
捐坊金爲倡釋褐令安丘臺使者以治蹟交上未幾
丁外內艱歸服闋補鹿邑令公至益自發舒賦溢額
蠲之土蕪蔓不理闢之集流移舉鄉約嚴什伍大要
以惠元元過姦宄爲急邑疆半侵於衛人民苦虛賦
公履畝以覈復侵地七千餘頃於是公聲稱奕然著
三輔間矣以令高第徵次當補給事中御史而特相
銜公著書有所刺譏僅遜南行人司副已轉計部員

外郎晉郎中凡鈔關板關之役以膏脂名者力辭不行時時典衣稱貸爲朝夕費至事關大體則不憚悉心以籌大司農倚重焉出守金華爲儲胥其民而裨席之甚具會歲饑穀涌公出帑金貴糴而平糶活饑民以百萬計郡故有先賢祠日圯公葺之更拓爲書院置田二千餘畝延師儒貯載籍以教語具崇正書院志中遷濟南兵使者兼治河時有議鑿性義嶺者公相度川原謂鑿壑而勞數十萬人之力損大司農金錢非便慨然建議有三當謀八可已二可患之說與總河大臣意忤杜門求去因調金衢而總河糜度

支水衡錢無算功卒不就朝論翕然多公居無何湖
中民變起上下驚然後假公叅知以填之公居湖黜
貪殘吏壹以清靜爲治若義倉義冢善政具舉而止
礦一疏先諸司爲民請命殆瑞卒詎于輿論者本公
首倡力也召爲南京兆丞再遷鴻臚寺卿會黃河西
徙漕綱爲梗公以分淮導黃爲非策抗疏極論之大
旨在于塞黃咽口復徐邳故河謂黃咽口不塞則徐呂
水不流江南四百萬漕艘無入京之路疏入主計者
訾夷莫決公引疾乞骸而奉 旨慰留給由復職攝
南京兆公再蒞事風清弊絕民以牧寧念士貧無資

前爲置田者寡矣至是爲鉤陳牘摻伏匿得五百金
益買良田以贍之如在郡邑時貢院之前築避雨舍
徙甃治衛不欲以霜體塗足爲多士惠也京兆有表
忠祠祀遜國諸臣公以爲未備檢括史志增至六十
餘人主成躬奉以入且輯忠節錄一編以垂久遠其
加意風教類如此累推光祿大常卿 命未下疾作
一日端坐而瞑惜哉公仕旣通顯敝衣糲食終身不
厭故廬泮隘不蔽風雨卒之日筭無遺金賴南中好
義者奔賻始克成殮夫世號潔廉者如建鼓而求亡
子惟畏人之不知也自非然者或硜硜堅瓠無當縣

官用公廉而不伐業與沾沾自喜者異矣其臨民泣
政殫竭心力至日不暇給或遇國家大計意氣激發
侃侃公所避雖責有莫能奪也公氣色恬穆鮮所見
喜怒乃至違上守已奇禍不折危議不搖殆庶幾社
稷臣之風而廉吏不足以禦公矣平生面目嚴冷交
游間正色直言不作寒暄語數歷三十年不以竿牘
一通於津要以此自立亦以此不合於時然公以悔
也而伊湖公色養終至又廣其意作族譜九卷附名
賢家訓于末創祠堂義田義學收族之貧者而養以
正復推其贏於周親問黨咸被焉昔范文正身無以

爲敎子無以爲喪而盡其力於施貧活族間如公之
所爲何必古人嗚呼難已公淮安海州人考諱景卽
伊湖公累贈中憲大夫南京鴻臚寺卿嫡母孟氏繼
王氏生母鍾氏俱累贈恭人配葛氏累封恭人子三
人應濯應泰應溶皆諸生孫一人所著三集外有孔
門傳道錄禹貢本末皇明貢舉考南國賢書宋登科
錄鹿邑縣志地志兩邑節愛錄全燕荒政邵晉水利
常平倉紀奏疏文集總若干卷公旣歿都人士思之
不置謂公清畏人知如胡威愛而能誨如子產爭傳
誦之猶若未悉其美也中丞耿公定力奉常丁公賓

給諫祝公世祿擬具公事仰請贈諡于朝未果余故
忝史職有善而不彰罪也爰綴其大都表於墓俟諸
君子以次而舉焉

焦太史編輯國朝獻徵錄卷之七十七目錄

尚寶司

卿

劉藻

張信

孫伯堅

徐文傑

汪文輝

少卿

袁忠徹

朱祚

李源

陸師道

徐自得

李先芳

潘士藻

司丞

徐宗負

白悅

吳性

孟秋

南京尚寶司

卿

夏瑄

楊崇

白玠

許穀

焦太史編輯國朝獻徵錄卷之七十七目錄終

焦太史編輯國朝獻徵錄卷之七十七

尚寶司

卿

太常寺卿掌尚寶司事劉公墓誌銘

孫 陞

余聞之詞林耆舊稱故相劉文穆公輔 憲皇歷

孝皇累著勛勞嘗讀月畢星津之疏有毅然不可撓者益仰想其風采及接公之季子太常卿乃又感嘆知有所啟之也乃太常公謝政家居於嘉靖戊申十二月十有七日逝矣公諱幕字用植世爲畿內博野

人初補校官弟子力學斬取科名弘治中詔錄文選
遺勲徵子爲中書舍人公出就職然以詩書自淬礪
脫紉綺習人咸稱之九載考績遷大理寺寺副仍掌
中書舍人事典誥勅惟謹又六載遷尚寶司司丞
武皇南狩扈蹕多稱旨賜金緋服三銀牌一今上
賜繡服一九載考績遷尚寶司卿掌司事又九載遷
太常寺少卿仍掌尚寶司事又九載遷太常寺卿仍
掌司事典符璽綜諸務甚理久監鍊達上下宜之以
年老休致令終上遣禮卿諭祭工曹治葬恩至渥
云公性簡重不苟言笑不輕議人短長不與世浮沉

歷事三朝通籍四紀聲譽流經坤間開封藩王者二
大祀視牲者九廷試貢士堂封者六舉稱任使無
忝奉文穆公暨母夫人吉氏孝養備至撫諸子愛不
忘勞下至奴隸復亦鮮鞭朴族黨聯絡恩禮周浹用
是卒也無間疎戚皆哭之盡哀疾革召諸子訣曰吾
平生無可稱述但守清白二字不墜家聲汝輩勉之
嗚呼真文穆子哉

尚寶司卿張公信墓表

楊士奇

正統七年二月三日尚寶司卿張信彥實卒於官張氏世居山東掖縣其祖若父皆以行稱於鄉彥實孝友出於天性自幼雖饑寒飲食不先父母父喪哀毀母病數更醫不效益困聞人肉可療疾即自封臂煮液進之遂愈永樂初鄉里上其行有司以達于朝下御史驗之信詔旌其門命為尚寶司丞授承直郎進承德郎居家事二兄如父壯老賤貴一致居官治職務勤慎處同寮有善能諫有過舉率自引咎其度有容同寮或造誣毀之或挾勢陵之一不投如門閭然

遇行不當理必據義執辭不以出位爲嫌前尚寶卿
朱琇輩行尊且有寵于上亦嚴憚彥實心恒德其
忠于已九載陞尚寶少卿階奉訓大夫進奉直大夫
侍 二廟監國凡上表奏則翰林書辭用寶函封畢
授尚寶以髹版夾護然後行一日所上髹版內夾敝
故紙既達行在內侍以聞命臬司詰所自 仁廟召
翰林尚寶詢之故彥實對云在函封內臣不敢預知
函封外則臣之罪遂遣彥實自陳其同官在扈從者
教之援翰林以覲倖免彥實曰不敢自欺況敢欺君
父乎臬司論彥實不敬有旨薄罰復職以是廷論重

之 仁廟嗣位首進尚寶司卿授奉議大夫賜誥命
以所授散官贈其父封其母太宜人又九載加四品
祿彥實樂聞善言初官近侍日接內閣諸公自念我
爲庶民望斯人如在雲漢何由得聆一辭今幸旦暮
相親其可自棄袖習論一編遇問處輒揖請教二三
公皆樂爲之盡旣終篇常涵泳不厭而日臨寫智永
千文一過不廢其爲人聞敏易直謙和無競交處有
誠年六十有六而卒葬應天府城南鳳棲鄉

尚寶司卿孫公伯堅墓志銘

孫 陞

嘉靖丁未五月二十有五日期列大夫尚寶司卿致仕孫公卒公諱伯堅字道夫其先山西潞安州人永樂間始遷興濟曾祖諱旺祖諱讓皆不仕父諱友以公貴贈尚寶司少卿母李氏贈太宜人公幼勤學弱冠補校官弟子屢舉不第學益弗倦漸以文藝自致會弘治癸亥孝廟覃恩戚里拔爲中書舍人公以君命不可違也乃出就職然猶耽嗜經史誦習不休正德丁丑考績遷大理寺寺副尋掌中書舍人事嘉靖乙酉遷尚寶司少卿壬辰晉卿加四品服色俸級

掌事如舊公諸練典章凡先朝沿革能悉記人有叩之無弗應者不爲崖峻幅截之行亦不燕惰阿媒待僚友和敬並至出入禁闥三十載謹厚無過聲譽流縉紳間當是時公弟伯強爲通政使司經歷伯義爲鴻臚寺少卿京師人士以興濟三孫衣冠之盛爲侈談云年未甚衰卽疏乞休致或勸止之公曰明主御極典百司庶政賸有人也吾以書生叨顯秩幸免過舉不於此時見幾引退更復何待疏再上得允輿論高之興濟小邑孫氏寔巨室公歸不以勢加鄉里又時時捐餘貲稍賑貧乏邑人多頌其德宅第在

縣治東築一小軒焚香閱書以怡朝夕軒側有園蒔
花木寄傲其間時二弟亦旣家居恒置酒與故舊高
會廣受之風余嘗南歸過興濟艤舟河許公出延
欸敘平生幸公無恙越數載乃竟不起距生成化壬
辰享年七十有六

尚寶卿徐公文燦傳

萬士和

公諱文燦字德章居泚溪之濱泚溪在邑東故號曰東泚大學士贈太師文靖公之孫封尚寶卿雲谷翁之子也始文靖公相孝宗皇帝總百揆識大體天下稱太平宰相雲谷翁遺逸江湖具山澤間儀公少逮事大父長侍雲谷翁晚去世味至於德器寬厚渾然天成則其所自得居多在邑中不問親疎賢愚待之如一邑人評論鄉大夫或可或不可至指公不問親疎賢愚必皆曰長者長者平生所言人過自少至老未嘗忤物亦未嘗有盛怒時親友交際饋送之儀

公一不失乃若人之答不答則公不知也年十六游
邑庠應鄉試不偶發憤讀書有遠大之志值文靖公
卒公乃尊父命廕爲中書舍人正德初逆瑾用事以
公世家子廕啖以富貴招致之公不往由是積忤瑾
意革職瑾誅始復原任公外貌樸實多然諾其於大
節侃侃不阿如是蓋公於人之賢不肖事之是非曲
直胸中了然若別黑白而口不言人但見公對衆談
論不甚剖析一笑置之不知公文明內止確乎不可
拔也時以詩鳴世者若崇陵方公輩三四君子皆樂
交公且結社長安里公每有佳句爲諸公鑒賞嘉靖

壬午轉尚寶丞上疏建白勲戚貴臣懸帶牌面親授受如舊制由是代領之弊始革公由中舍尚符璽以迄致仕居官五十年歷事孝武二廟及今上皇帝每視朝公捧御寶常駕前委蛇趨跲不失尺寸

上嘗目屬之辛卯陞本司少卿戊戌上如承天公以職事從辛亥陞本司卿加從四品服級凡朝廷典故新進少年未諳曉者以問公公記憶甚悉歷歷如指掌蓋公位雖未尊而承事日久屹然爲衆倚賴可謂老成典刑者矣公在內與會試者一與廷試者二在外捧冊封藩王者四齋詔諭者三宣祭告者一每

荷命必便道歸省雲谷翁及母將宜人世美其榮雲
谷翁與宜人白首齊眉性復喜賓客賓客滿座公時
頰眉亦皓然矣與其諸弟執役左右甚恭賓客跼蹐
不安自雲谷翁夫婦及公兄弟一門榮祿壽考人以
爲相國食報之遠然公之厚德要自有以致之公貌
勁直精神溢出儀表步履強健當人老年生育不衰
蓋其機事少則抱一不離心不耗散則神完而守固
理有然者林居十年不東肩輿與親戚談舊事終日
無倦色性容忍有常視世人視勢之盛衰爲趨避者
斷然有所不爲友于兄弟至老益篤以故鄉人歸之

無間言公每爲人所負不責其無死之日家無餘財
嗚呼公其先民之遺也與古謂世祿之家鮮克由禮
慮其以侈奪志也若公者設一旦授以萬鍾其意氣
必不盈溢情拘於時日不得秉政事不然卽休休有
容無他技之大臣何以加焉

尚寶司卿汪公文輝行狀

潘士藻

尚寶汪公諱文輝字德充別號都山系出唐越國華
當高皇帝庚戌開科有詳翔者登第官應天府尹
四傳至於福遷古豐古豐之有汪至尚寶四世矣父
初號碧菴以尚寶貴封如其官母江氏贈宜人碧菴
公嘗道出得遺金數十斤謹護以待失者至而還之
時家故窶甚明年尚寶生祖東軒公方館海陽夜夢
異人自空降鼓吹隨之入戶熟視之一嬰也覺而喜
亟謝主人歸則公舉適二日與夢符固已卜其必貴
長授易爲諸生發憤精研始若憤憤他日閱至哀公

問政章忽覺了然若神來意得者自是業愈入解而性故廓落魁壘有大志嘗經五城值水漲爲筏者所厄奮袖謂曹偶曰異時所不成此津梁有如河道路咸日笑之公意氣自如家壁立不具晨炊得一錢輒周人緩急忘已之舉火待也當就臺試友人與偕者馬旋墮水苑同列以試逼倉皇解散公獨畱殞之乃去比至試事罷歲甲子督學天臺耿先生優拔之試卷爲鄆陵劉公養旦鑒賞寘本房第一明年登第觀政工部念碧菴公素善病上疏歸養未及下不能旦夕濡忍遂先發途聞訃號泣欲絕亟馳歸哀毀如禮

已而江宜人亦病繼卒管葬鳳山之隅廬其側服闋
北上授工部虞衡司主事會見連歲水旱國課日損
武備廢弛紛紛興作不已欲以職守爲上聞陳節
省之要以任事淺未輕發而日賢部尚書鎮山朱公
裁縮諸浮費凡大內管繕苦爲中貴人漁蠹憑依城
社莫可爬梳諸解戶上諸物料需辦賒削有爲所中
繫經年不釋者而所侵奪官產無算尚書以付公悉
覈蠲之解戶鋪墊之費得大省繫亦釋入督煖關工
裁減幾三之一大取譬於貂璫以危言相撼公貽書
力爭且將執奏司禮爲之氣奪有焉聞者請故所沒

陶真人第公獨計第壯麗畱此以待勲戚柰何徇中
貴人執議不可至今 上以賜戚畹李所省大司農
錢數萬部尚書賢之獨誠母過剛生事端公受誠益
務脊重而名籍籍起時受尚方賜者再高新鄭以內
閣總銓衡改公雲南道御史公既居言路益思所以
自效而會新鄭修故相徐華亭之郃諸門下客懷觀
望日媒蜎之爲彙端公心虞新鄭內傷于所恃而外
中于浮薄之口乃上疏專責言官曰臣觀今日臣工
競務標榜險陂交傾大非濟濟師師之誼且墮國體
夫言官司封駁職糾劾固將正君心正朝廷正百官

正萬民者焉有已不正而可正人者哉臣每追思
先帝末年委任大臣夙德重朝端衆賢和庶位始以
一二言官見廟堂意見稍殊猜疑一生嫌隙遂起觀
望之徒窺其所向而攻其所忌且勢無常盛情亦隨
之或向或背態變于終朝乍賢乍佞評更于月旦倒
置是非熒惑聖聽以致二三耆俊進退不一其中又
有鄉里故舊意氣激成者臣愚以爲此非大公之心
也臣每見正人君子論事理辨人才止嘆息弊時有
指摘聞者愧屈非中無所爲而大義之足服其心乎
夫前事不忘後事之鑒使今不知謹而復踵其弊臣

恐傾陷成風消息迭勝邪正混淆忠詐莫辨于宗社
至計不深有可虞哉昔宋元祐之事始也以君子攻
君子卒使小人投間排衆正而階禍亂千古覆轍柰
何不鑒故正心術戒觀望爲言官第一義次日謹條
陳戒紛更曰慎糾劾戒苛刻曰平意氣戒護短而要
歸欲大臣戒夬履之厲勿用希旨之人毋令中傷善
類以自累疏入新鄭喟其異已而爲華亭游說竟出
僉憲寧夏公雖去而諸翁翁訛訛之議竟沮事在
穆皇帝辛未春公抵寧夏覩邊民窮苦狀下令省刑
輕徭寬逋負招流移給牛租條陳屯政利病而酌其

機宜時監課累虧運司所發多浙引價廉而無所牟
利商不樂趨滯特甚軍餉告乏乃建議以淮浙各半
均疏之又請以花馬二池鹽課爲夏鎮挑渠助糴民
勞而兩壩水閘議驅石易之或疑其費巨會慶藩以
歲祿時給德公致饋金不復謝則輸以建開宣言慶
府之樂義也王悅更大出金助諸閘帥及撫朔方者
咸願助竝完閘十二所稱永賴利矣公日夜爲籌寧
夏利害實關全陝邇者士馬疲于援衛之煩民力竭
于賦役之重上之人猶一切按陳譴謂其地饒魚鹽
粟米爲塞上江南莫之軫恤居民大困多歲歷時時

爲幕府言強邊之策莫急恤民遂得准豁無影田糧
萬二千石有奇諸亡者稍復業而課更以最先是東
路套虜黃台吉乞互市督撫檄駐清水營將明旨監
之明年壬申西路虜賓兔復以互市請公奉檄監焉
乃托獵出單騎立沙上以示虜諸酋悉下馬羅拜迎
入帳房賓兔親撫胡琴進卮酒公爲引滿而徐令軍
中具酒食賚之虜輸誠受賚至畢市叩天誓不復反
且稱東虜數奪西番賞賜願得一報之公諭爾事我
猶西番之事爾也汝以西番故構東虜藉令不勝我
能坐視弗汝援耶吾視汝兵力弱姑務自靖毋躁舉

傷天朝浩蕩恩實免稽顙謝低回不忍去蓋自是而
互市之議定時有議減軍餉者公力言邊軍勞苦厚
恤之宜得其死力奈何以旦夕寧故罷其供巡邊蕭
兌隅公以間議遂寢公銳意肩事持論悉執于正雖
嚴貴愈益誇誇伸其說不能一語徇要以脫人于厄
前御史孫丕揚得過高新鄭某子甲希旨間之行該
省勘問直指會藩臬諸大寮計所宜覆相顧錯愕不
敢發公獨抗言今無他端而訖畸一按臣以快用事
者之意此必不可因緩之無何朝事更某子甲坐阿
附免孫公前構得雪起中丞折簡謝曰微公言某不

知處所矣僉事職刑名盡論釋諸矜疑者所平反若
千人而艷妻殺夫無左驗一鞠立得其情遂伏辜公
故不以家累隨行厨所需米鹽必藉卽邊帥餽遺世
所視爲外府者一切閉不內踰年以邊功受賞四薦
剡亦屢騰今上初政新鄭廢朝廷追論前御史文
輝所論當國是遂召入爲尚寶卿公既還朝猶日以
軍民瘡痍達司計典樞之臣益屢致意焉天臺先生
起尚寶丞過從相得驩甚因數爲提掇問學之要微
言時有所入而察東泉石公阜南陸公意氣懸合豁
如也旋將卅命東使齊竣事過家遂引疾請告公雖

林臥而心懸魏闕至懇聞一賢人進輒喜不勝聞一
匪人進輒如負痛悵悵竟日書勸江陵張獎拔豪雋
無以常格拘預朝廷數世之用苦以振刷之名行苛
刻之實督責日深徵科日急雖有近功實基後禍中
韓流弊尤宜切戒當是時公已先見江陵之徵入之
以奪情于正議忠諫見鉅匪人驟登北臭濫鼎甲公
知言之不入遂決志不出而會鄉人有絲絹之競按
祖制後湖州籍絲絹實歛征一旦稱獨累推派五邑
民相恐大孩至厘撫按奏牘公鎮譁以靜而調停于
上竟得旨如舊制公登仕版二十年履任繞四禩天

臺先生嘗勸以蚤出口吾人語默出處原非二道昔
富鄭公當使金卻獻納時其英烈亦庸之賢也後來
相業則得之守口防意多矣賢近得此力否公得書
深自愴悔覺曩所爲英氣大露與友人書謂昔日惟
知成其是今日始自覺其非因繹舊聞潛心語孟義
易大義有所得疾書之爲草窻見意稿屬江陵物故
言官發馮閤之奸主上赫然削藉諸黨與卽故所
嘗推轂者悉累齒牙而通延乙亥以來建言得過諸
臣已又詔廷臣議召跽伏淹廢廟堂輿論翕然首公
下議銓衡銓衡盛擬還之侍從而公竟以甲申三月

得肺疾四月二十三日遽終距生嘉靖甲午十一月
十八日年僅五十耳憶昔辛未春闈初試之日則公
上封事日也翼旦得疏草方食棄匕筋起立急讀之
豎儒勃勃生氣公聞而心相善也甲戌與公更相切
磨于天臺先生公素不爲致良知之說天臺先生語
予德充肝膽腸胃雖凡乃無一念不朝廷非實致良
知者不能山居于民衆多所建白郡邑大夫無不折
節者居常稱貞者事之幹吾以一言爲終身之符予
曰大直若絀大道委蛇古善藏其用以幹天下者類
若此公曰人臣之義以王陵爲正吾從程子乎最後

益嚮往于學幾乎遠伯王之知非說者謂公再起下
之蒼生朝之善類將實賴之而公不逮矣卒日不能
爲斂具蓋公起孤寒仕益不屑生產而諸父昆弟姻
黨死喪時有分子身所嘗食同僕御之賤者客時下
車存之乏坐具僅以竹甌治一肉脫粟之飯爲歡退
而服其脫畧然卒豐五城津梁之志鄉人語曰嶽嶽
大夫洪流作砥塗語至今傳之

尚寶司少卿袁公忠徹墓表

李賢

士生天地間有遭遇明時而不得見於世者有見用
於世而不得見知於君者有見知於君而無才術以
顯其名者有名雖顯而不能保全始終禍壽俱降者
今之君子兼而有之者吾於尚寶袁公見之嗚呼休
哉公諱忠徹別號靜思前人世居南昌至七世祖
誠仕宋累官刑部尚書南渡時居歸家於鄆六世祖
芳爲吉州泰和令高祖縉咸淳進士爲宋死節曾祖
澤民養道不仕祖士元爲元翰林國史院檢討父珙
國朝太常寺丞贈中順大夫太常寺少卿母倪氏封

恭人公自幼穎敏神氣異常讀書強記童時已能
詩文凡名士鉅儒一見知爲大器太常君精于風鑑
公得其傳 文廟在潛邸時聞太常君名以書幣召
之公隨侍 文廟見公論相大喜賞賚甚厚尋許歸
家未幾 高廟崩 建文嗣位信任非人猜忌宗室
文廟不安因有靖難志召公問之對曰天命有在誰
能禦之奉命纂人象大成書以獻賚予有加壬午夏
文廟入正大統遣使召公父子至官其父太常寺丞
且曰忠徹臨事有斷制所言多驗特授鴻臚序班賚
賚殊厚公入謝曰 陛下當畏天修德繼武崇文率

由舊章振肅綱紀樽節財用明慎賞罰禮稅大臣黜陟臧否用臻太平之治竝賜嘉納尋知公在戎籍卽令兵部蠲之又嘗勉公進學公以務冗對遂陞尚寶司丞且曰此職有暇可親詩書公退而感激不怠庚申改中書舍人已丑春營北京公扈從既至日與大議復遣中使召太常君至父子相隨出入禁庭尋密遣公乘傳看楚王子重瞳公還奏無他異庚寅春以公父高年優養遣還公扈從北征既還上屏左右從容密問大臣優劣之狀武臣丘福未能張輔李遠陳懋柳升降祥文臣姚廣孝夏原吉蹇義金忠異中

呂震李廣方賓公一一論斷以對 上曰卿所識鑒
正合朕意是歲冬太常君卒賻葬加厚公奔喪畢詔
起復之癸巳春扈從至北京甲午春復扈征瓦剌乙
未夏 上謂公曰東宮不聞教子對曰臣聞古者不
親教子宜選文學老成之人以輔導之責其成遂選
儒臣儀智陳山等日侍講讀丙申春秩滿復尚寶司
丞特加賞賚戊戌春召公至便殿示以進陛之意公
固辭以父未有贈官卽日召吏部贈其父官賜誥命
公益感勵進相書機要丙子陞尚寶司少卿恩典稠
疊莫與爲比壬寅春扈從北征公言利出東路 上

不從消還軍在東者果大獲復觀將兵者得利已而捷至每從征所言無不驗者 仁廟登極待之尤厚賜誥命尋賜還家燎黃省視 宣廟嗣位召至京宣德改元丁內艱不獲奔喪詔以從子代還襄事一日觀 上容色曰宗室人有謀上之意七日內果有報漢王反狀者公扈從往征之既還受賚彌厚甲寅春得展祭還乙卯春今 上嗣位公入朝已未夏懇乞致仕既得請南歸傾朝縉紳祖餞都門外公之術奇驗於 文廟者不能盡述若公效忠讜論則人不及知者甚多如終大孝之情而甚密機事論養賢之實

而瞻其取給乞賜孔氏玉軸之誥歷言遣使取寶之
非議武職宜准終喪諫服藥勿信方士如此之類皆
有人所難者休官居閒二十餘年忽遘疾顧其子曰
死生常理吾何憾惟誠信忠厚可以立身汝宜勉之
屏藥端坐而終公生於洪武丙辰十一月七日卒於
天順戊寅三月三日壽八十有三公爲人慷慨有大
志不隨流俗正論毅然不以利害少沮與人交洞見
肺腑不立町畦見人患難惻然力援傾囊不惜理有
不直者面折不少借其致政也間朝廷出令之善用
人之當則躍然而喜有不便於民者必憂形於色此

其爲人豈特風鑒一事可稱道哉所著鳳池吟藁符
臺外集若干卷

袁忠徹得其父太常珙之傳以相術妙天下嘗道吾
蘇過閭門沈氏沈一子方周歲抱求觀尚寶笑且撫
其首曰切頭切頭更無他言沈以爲戲弄耳其子長
名洪凶狼不肖竟坐重辟是歲錄囚止此一人吳諺
至今有沈洪出閭門獨殺之語又嘗入南濠徐生藥
家生子適三日方浴而啼尚寶及堂聞其聲曰是一
強盜耳徐聞而怒幾欲捶之子後亦以探丸論死古
有視熊狀而知滅族聞豺聲而識喪宗者殆不多讓

也居鄉時友人家一童子姿貌韶秀且性機警尚寶
相之以爲不利于主使逐焉友雖素神其術然意不
忍也數言之不得已而聽之童旣去無所歸往來寄
食于人一夕宿古廟中久不寐見牆角一破衲中裹
黃白約數百兩欲取之忽自嘆曰我以命薄不得主
意橫被遺逐今更掩有此物則是不義天益不容矣
當守之以待失主至旦遂住廟中不去已而聞哭聲
見一婦人掩涕而來四顧彷徨問之答曰吾夫軍也
以事繫獄應死指揮某者當治之妾賣家產及假貸
通得金銀若干將以獻彼因裹著破衲中挈之過廟

少憇不覺遺下今追尋無得吾夫分苑矣童歷問其錠數多少皆合卽舉以還之婦感激欲分以謝不受遂攜去夫因得釋念童之德徧以語人某指揮者聞而異焉令人訪致之育于家年老無子悅其美慧遂子之又數年致仕此子遂襲職歸而告拜故主主嘆曰袁君之術乃疎如此乎畱之遲袁至使仍故服捧茶而出袁見之驚起曰此故某人耶何以至是主謬云逐出無歸今又來矣袁笑曰君無戲我今非君僕矣三品之武官也形神頓異疇昔豈嘗有善事以致茲乎此子爲備述前故友乃嘆袁術之神焉

盛琦寧波衛人少服役于劉指揮家袁尚寶忠徹過劉見其執扇在旁謂劉白善視此兒乃進士知縣也後果業舉子登商輅榜進士授無錫知縣

東溪先生楊浩然諱集髫髻時父穀堂徵士諱宗字叔振命早過鄰家黃氏其家門尚未啟從門外呼之有一人聞叩門聲閤中呼先生將與語先生心懼不應急扣而入論事畢天已明黃氏子式送出門其人猶在注目良久問曰汝爲誰氏子旁人謂曰楊姓其人曰惜哉吾初聞其聲法當位極人臣名滿天下故竝立伺之今觀其貌與聲不稱後日官亦至五品然

其聲洪遠不在其身子孫必有興者又謂黃氏曰此兒亦不凡位當七品言畢竟去徵士聞其事遣人追訪之其人乃袁忠徹也東溪先生年十八爲縣學生嘗齋詔至福山巡司例有欸贈銀五兩同行者又二人皆長年庠友也盡取之止以欸筵食品送先生先生以二人皆前輩口雖不言而心甚不平其地濱江逕向江獨步而去二人疑先生有後言徐躡聽之先生至江濯手欣然笑曰巡司齋詔豈吾志哉願此輩常享例贈矣二人竊聞之從後遽推先生入水先生兩手下拒入沙土中持一物起視之乃銀一錠此銀

入水久爲波浪洗齧光潤瑩白傳玩可愛適與巡司
贈禮輕重相符人共駭異醺酒臨江歡燕而別後先
生以景泰五年會魁及第觀政兵部以章綸鍾同事
上書言之進一級除安州知州後亦下制獄去位我
朝進士五品出守自此始壽七十八終黃式以歲貢
官至知縣忠徹神鑒並驗云

尚寶司少卿朱祚傳

實錄

朱祚字永年浙江寧海縣人性聰敏九歲能詩永樂八年以秀才徵試事詹事府尋爲鎮遠侯家塾教官十三年進元宵觀燈賦上喜而賚之由是知名洪熙初用尚寶司少卿袁忠徹薦擢行在中書舍人宣宗見其詞賦處之近密特陞翰林院修撰秩滿陞尚寶司少卿命敕中貴人書祚能詩文援筆立就負氣好直言不恤毀譽晚稍自懲因沉默齋且善談命言人禍福多中云正統十年正月卒

尚寶司少卿李公源行狀

王慎中

公諱源字士達別號竹坡泉州晉江人弘治壬子舉人登乙丑進士初仕爲戶部主事轉員外郎終尚寶司少卿高祖德盛曾祖長生祖應禎父明封戶部主事妣陳氏封安人先世居邑之清溝里實徙自唐郡諸著姓而清溝之李爲獨舊封主事朴茂公始徙居郡城公以成化己丑八月初四日生嘉靖庚子二月初六日卒享年七十有二生而簡重嶠岐頭直手恭不習而能自幼學至壯以老無燕僻之明世俗嫫媿之語不敢至其耳爲學官弟子已以文高伏人而行

潔禮莊同進尤嚴之一時之士盡出下風出行途中
足跡所履直于繩引絕不側視反顧自後躡之不得
一見其顙顙嘗與友人入市購書有爲角觝之戲于
前者友人皆舍書就觀公獨取所購書著袖中徑歸
友人請其矯公曰吾乃不聞鼓聲好義遠利篤于天
稟而修之以不倦遂成自然邵侯馬公屢試其文異
之獎待溢甚公唯唯而已終不私至邵庭一有所謁
卒業成均文試第一京師人口相傳其篇以熟布于
四方家而有之故相楊公廷和時任翰林其子今殿
元公慎少已有大名楊公以禮來聘曰吾求士于都

下非先生莫可屬以此子公感其意終以濡跡貴門
爲不樂辭以疾自其未遇不近于榮利已如此爲進
士奉使廣東督發稽留諸賦故事藩司以使事相聯
綴贈遺特厚至百餘金舊使者以藩使官尊長者遂
巡不敢卻公一無所取藩使重其守購大儒陳白沙
先生字書四幅爲贖公拜而受之使還除戶部差監
臨清倉倉故置中貴一人董視之中貴人嗜貨與諸
吏徒甲保乾沒爲姦利事憚公嚴恪數治酒饌爲好
會冀娛公意公舉盃濡唇而已中貴人知不可動盡
一歲中斂手不大爲姦恚不得恣所欲則構兵備趙

副使使侵撓倉事授吏徒公疏其事以聞并劾中貴人罪狀事下戶部尚書孫公九峯歎爲得職每舉公官氏稱于曹中以勵屬員歎爲家宰馬端毅公言公值逆瑾用事以在臨清劾中貴人事記其名遣轉饒遼左故縮其期陰欲中公以失期時天寒雪深數尺晝夜行雪中日二百里竣其事以報瑾不能中也是時翰林楊公已爲宰相公之在臨清往遼左楊公問公何在公若不聞楊公無由見其面心尤器之楊公與馬家宰孫司徒並一時名臣雅知公將殊用之不爲逆瑾憾沮然公念父母不置勉強在職三年得如

制以其官封父母喜曰吾願畢矣疏乞終養孫公勉
諭再三察其誠懇亦不能留也是時瑾用事未張

孝宗之遺澤猶存士大夫習于晏熙高重不樂去職

公之去人咸以爲難薦紳咨嗟瞻送填溢都門有賢

大夫之歎事親養而能敬迎于意先不詔而悉自居

息早暮飲食多寡衣服寒煖具適宜節陳安人好怒

女御押侍猶不當其指日數十怒公在側則歡竟侍

一日則安人竟日不怒公在職不能俟三年而歸益

患安人之怒也安人患痺公制軟輿自與莊安人昇

之游嬉堂中公素有足疾蹇蹇然行也女侍苦公爭

是代公曰非爲乏使欲以用勞爲小孝耳且吾自勝之不爲苦也朴茂公與鄉長者爲逸樂會多微時所交公親爲執弟子禮不敢與諸長者抗每會公必自視肴酒致其芳美長者坐定公出洗爵實俎徧奠在席畢則屏息立楹間長者皇恐不敢當起立再三辭公乃退朴茂公出公躬爲挈裘束帶扶持登車未反盛衣冠以俟或大醉手煮湯茗進之俟寢然後敢休臧獲迫事朴茂公者有大過不加呵杖叱吒不至犬馬服御器物敬置之朴茂公置妾蔡氏數犯陳安人安人故好怒又患痺不得有所爲益怒公側怛寬曉

曲爲掩護父母之間無間而蔡氏免於罪謫其用意
獨至家人有不及知蔡氏生子洞公與均財銖髮無
所加分田多取境垆以自損歸養五年而陳安人歿
又十年而朴茂公歿十五年之間左右無方聽聲視
形極天性之樂朴茂公春秋高公亦已老坐者溷丹
立者垂白七箸盤腸之奉溫以愉色泉中傳誦嗟嘆
老者自恨少者自愧以爲不及朴茂公歿于古禮惟
衰麻在身時矣猶哀悼感疾嗚呼可謂純孝君子也
免喪或勉以仕公不可或諷以貧公應曰吾養二親
身不及祿而心甚樂今已謝二親反老而爲子孫謀

祿耶言者屢薦于朝故相桂公萼爲吏部尚書奏以
南京文選郎中就家起公久之少傅方公獻夫代桂
公爲吏部遷拜公尚寶司少卿公竟不起疏乞致仕
方公于公同年進上也歎曰吾乃終不能用李君幽
居以文史自娛所居近市庭戶蕭然門無雜賓病足
不喜出遊兀然一室焚香展卷正襟而坐俯仰千古
之上清爽恬曠脫出塵垢其趣絕去甯連杯酌以山
水爲妖艷者遠甚無他玩好尤屏淫聲平生不御絲
竹與人談有及物價市利竊縮低昂之說卽口塞似
不能言至于陳說理道揚權風雅聲聲有韻如巨木

撞鍾鳴聲應叩聽者忘倦咸灑然有得自謂發矇工
古文詞以左氏爲宗雄偉奧健其語所獨到斷破規
矩亦自爲方圓一時贈別頌績銘幽記遠之文非出
公手皆以爲不得所託行尊輩舊學爲時師尤不自
標特謙冲下接好獎誘人材汲引後進如恐不及後
生一行之善一句之工寵借嘉樂患人人不聞清約
自將甘脫粟之食衣裘不能具襲褐纔取蔽體蒼頭
五人應門給薪水而已始公爲布衣朴茂公饒于財
衣食不至苦惡人見爲豐旣入仕處顯矣清約如此
又見爲儉不知公終始所守不殊一日人自以晦顯

異見耳郡邑大夫欽慕德履承風致敬旬月必一造其廬不效踰垣閉門之隘往來交際有儀然不以他事相溷久之其敬彌篤遂論爲先進之交及去爲他官廢居異地猶好問不絕若句吳顧公可久四明屠公倬是也二公並時名流惓惓若此必有得于公者深矣監司部使者行入郡境已知有竹坡先生其所以下公與公所以答之者亦若是家居前後薦者凡七章雖知公有詳畧大指以公爲廉孝人也公自起進士凡三十六年有田百畝宅一區皆先人所遺歿無以爲殮諸子貸于人先大夫歸賻財而僅成禮今

其葬鬲田而後辦諸子常不免於饑何其貧也始公宅燬於火久不能興窟伏草莽瓦礫而寓其孥於他郡侯王公士俊蹙然歎曰及吾爲守而使賢者無以庇其身吾之愧也議捐貲助之公皇恐不敢聞命一日以可否問某應曰此古道也古者邦君諸侯尊事國中之賢衣弊爲之改造當食爲之授殮又爲築夏屋以居之渠溝然大也及其稍衰猶有國中授室築宮而師之之禮侯之此舉合于古誼公其勿辭于是受助而築室焉其堂僅成而房寢庖廐不能完嗚呼可謂貧矣公用不究于時而行施于一鄉所謂歿而

可祭於社非先生其誰

尚寶司少卿陸先生師道行狀

先生姓陸氏諱師道字子傳始號元洲歸田後別號五湖道人學者尊而不以官名因稱之曰五湖先生先生世籍長洲高祖繼宗曾大父鏞大父瑋父平以公貴贈都水司主事再贈尚寶司少卿母陳氏累封太宜人贈公嘗服賈吳越間後稍及交廣歸道病竟卒真州先生年甫十六卽已嶄然能自勸學立節槩弟安道纔足勝衣而女弟一二笄笄在室里中豪睨先生文弱輒難以重役先生摧亢忍詬以扞內外齟齬者甚備每旦出調委輸事暮歸則課安道讀手一

編恒至丙夜而是時王先生穀祥稱善治易先生束
贊往受易說多剖析文日益起服闋就吳縣試補博
士諸生無何太守聶公豹藉諸生穎敏者更業春秋
及曲臺禮先生則更受春秋一歲中盡究其義明年
庚寅餽學官廩又明年辛卯薦應天高第又七年舉
嘉靖戊戌進士常射策時貴溪相第諸所奏記手先
生卷輒擬首曰是文宗賈董字法鍾王者比進御抑
置二甲第五人分視兵曹政授工部都水司主事其
冬尚書檄下畱臺尚衣先生往督進奉歸拜母壽已
亥復檄徵上共銀幣旣竣事還理寶源局鑄鑄監陵

工治方中約法勾稽姦吏洗手奉職不敢私一錢庚子改禮部儀制司主事入管制勅房明年太宜人病請急歸侍不許再疏乞休四上書宰相始聽予告旣歸則日侍太宜人太宜人數病氣宛篤每發先生親侍湯藥臥起未嘗少間夜輒焚香額天祈以已算益母更刲股嚙以進霍然盡解尋復病失明先生三爲飭日復明後數年太宜人卒先生孺慕哀踊朝夕湔米毀幾不勝旣禫遂病風蹶時嘔沫居恒憤憤然獨謹喪禮不遺毛細先生歸侍十四年而母卒卒二年而病病可五六年而愈然竟先生之歸足不及郡縣

一千請未嘗抵政府一書海內益高先生賢而重其
孝部使者累疏薦先生可大用乙丑以南京祠祭主
事召數月遷膳部郎復改尚寶司少卿丙寅入都旋
諭祭秦府過陝濯驪山溫泉登太華辨仙掌入終南
南麓徘徊杜曲樊川者久之秦王雅熟先生名至則
貽書及他珍寶可數百金先生一切謝弗納還會
穆廟登極恩階率直大夫協正庶尹戊辰署司篆以
勞憊故疾益發復疏乞骸骨上特憫賜歸勅吏部
須先生病已更微入歸又六年而卒先生少有異稟
六歲日誦千言七歲能爲詩自始學入官至疾未死

無一日去書不觀博極羣籍鉤微抉精下及星經地
記釋官雜家之言悉入記覽平居坐立不傾欹步履
率有常度性持寬大喜施尤厚於倫誼撫弟安道最
有恩中年安道請廢著先生爲泣諭不解乃悉畀以
父產先生故不家于官至是益赤貧無餘安道卒撫
其孤士寬士寬卒又復撫其孀娶財帛闌出者一恣
無所問嫁庶妹務出厚貲收沈氏甥爲畢其婚娶先
生所絕不交者權貴而亦不狎近羣小絕不口人過
失然至後生有一善則津津道之弗置所居一廬僅
足嘯咏歲所獲穰田亦不過百斛甃突常不溫意豁

如也四方造請碑誌者遺餉稍贏輒斥而召客歌呼
窮日夜費盡無所顧或親黨貧不能具斂葬者特以
分去亦不爲惜好事家日載酒邀先生天池上方虎
丘間流連觴詠而先生故所善二三耆舊王參議庭
彭秀才年王太學寵文博士彭日相與楊摧今古品
藻泉石每游賞輒指以爲圖和歌相倚超然遺世見
者幾以爲仙而先生亦雅自忘其不足矣先生爲文
法昌黎詩取大曆中語五七言律得孟襄陽岑嘉州
致小楷情絕大都似顏魯公仙壇記晚歲尤工隸書
咄咄自謂逼韓李畫法獨喜倪元鎮而傅染精麗者

遂不減趙吳興吳中故重文先生徵仲謂得四絕先生自棄官後則往執弟子禮甚恭故他文稱多類徵仲而名德亦相亞云年六十四

尚寶司少卿南州徐公自得傳 程 紹

公先世系胄四明 國初詔徙吳越大姓實中原乃
隸籍雍丘 繇伯貴至前封兵科給事中江三世矣公
蚤秉淵懿之資長負穎拔之概 嘗質被文藻學厲行
爲諸生冠甲午舉河南鄉薦人覓張劬之舫士識李
邕之面蓋籍甚一時已戊戌偕計南宮聞母楊孺人
之訃蹕踊慟哭瀕絕而甦嘗着伏夜八哀憶昔吟數
千言以自悼詞窮悲慙彷彿蓼莪之什辛丑成進士
時同里浚儀王公廷相鄂陵劉公訥雕真人倫勝業
士林以其品隲方月旦之評豫士獨公暨少師新鄭

高公大爲所器焉筮仕行人司行人奉使藩藩明典
禮卻餽遺得使事之體竣事迎養封公于京邸晨夕
定省奉顏色陶陶如也丙午召入掖垣改兵科給事
中時大虜擁衆戕殺朶顏福餘三衛諸夷內避乞給
衣食耕具或謂夷虜相戕乘是可收莫韃之利者公
上言朶顏三衛夙稱崛強一旦遭破殘之慘旣不敵
手彼將必窺利于我烏窮則啄獸窮則搏勢固然爾
迤北諸虜性猶豺狼旣飽而驕饕逾亡厭且朶顏旣
破撤我藩籬何所顧忌超超而不內犯哉宜稍給所
乞收諸夷無賴之心陰諭以雪耻復讐之義仍申飭

邊儲糴堡廩以觀未萌之變已而虜酋卑辭求貢
詔覲候我邊防以圖大逞 廟謨特許之廷臣明知
其詐而陰關 上指所繒觀望其敢發公抗疏言夷
狄乞貢大端有三有敢遭到鈞震他誅夷畏我強而
來者有夷運式微犬羊悔旣量彼弱而來者有謂入
貢不亡一鐵而得戰勝之利邀利而來者今有一于
是乎異時俺酋嘗遣石天爵求貢矣亡何瞞我偏頭
戕我全晉橫被毒鋒盛近事之鏡已照虜敢以故智
紿我而我詎容再售其術法曰解甲而益備者進也
臣以爲勿許便疏入五日不報同列咸爲危之命下

則大見采納它日有以吏垣協理請者疏不及公也
特批曰徐某乃知 上默識公名固將大用之矣是
歲九廟成還思父母皆得受今封卽陳情終養旣得
請南歸賦閑居于板輿詠循陔于蘭膳朝夕承驩爲
百年壽又四載庚戌封公卒公容瘠骨立人稱夙孝
至居喪悼禮備極情文又爲四方取則焉已奉繼母
田儒人一如奉封公居則游情圖史以閒卷自娛祝
世情焚華脂韋不翅將浼如是者數年然公旣簡在
聖衷卽家食滋久人咸以大用靳公乙丑詔起諫垣
再乞終養不許人朝補工科給事中先是河決曹縣

防河使疏請開趙皮寨孫家渡以殺水勢特遣侍郎
吳公鵬都御史魯公鈞董其役公上書極陳關緊祖
陵周藩至急乃不果開至是當事者仍議徐沛運道
於平宜亟開汴河以疏黃水漫流公援証往事反覆
辨其不可大畧謂汴河肇開自隋下通宿泗而達廣
陵數百年來湮淤殆盡卽欲開鑿糜費不貲使開之
水卽行勢必南走泗州寢園可虞使開之水不至匪
徒亡益誤奪時日運道之治反後已時聽其言開汴
之議竟寢晉尚寶司少卿履任之夕卽聞田儒人訃
匍匐歸里襄事而公且堅臥不起矣蓋公起家三紀

立朝莅官甫四年餘皆優游泉石之日也既歸構市
隱堂數楹歌誦其中且齊物蒙莊春懷仲統學衛生
之經廣臥遊之適樂志棲神青年儒色亦恬澹足以
養生之驗已公先後雖執三喪哀毀惻怛如一平居
杜門卻掃跡絕履恭然引拔善類如恐不及臨財非
義麾斥千金不顧也至尊睦宗戚厯卹孤寡則倒盂
生之篋折馮煖之券亡所吝人以它事干請者正色
謝絕至里閭有大利害則不惜投冠喬袂爲之上鳴
癸丑師詔之亂賊勢猖獗帶言舛犯公亟請于當事
者提兵入援躬自巡守爲士卒先賊偵之竄去異時

杞種巖邑徭役甲于它屬公力陳負重困憊之狀得
從末減里人迄今誦德焉公詩尚典匱不驚穢靡文
爾雅有則一洗鉤棘雅工詩餘小令少游美成而下
不多遜也所著有苦中踏坐二景京華集京華續集
天游子樂府二冊藏于家公諱自得字深甫別號南
州卒于萬曆乙亥距生正德丁卯年六十有九

尚寶司少卿北山李公先芳墓志銘

于慎行

北山先生姓李氏諱先芳字伯承其先湖廣監利人
國初以士伍徙因籍濮州高祖以下五世同居考
贈尚寶司丞雙泉公諱鑑配劉太安人舉二子長爲
先生先生生而蚤慧風姿甚都從伯父蒙泉公受經
十六能賦詩伯父器之會選良家子尚主使者入先
生名例補博士諸生先生謝不受也踰期試而爲諸
生年二十當嘉靖辛卯舉省闈高第六上南宮不中
中丁未進士時先生詩名已著而不與館選識者惜

之乃與歷下殷文莊公李憲使于鱗任城斬少宰臨
清謝山人結社賦詠相推第也明年選爲新喻知縣
新喻者江右陋邑民吏頑梗憚不畏法虎夜入城蛇
聞于寢先生弗愠也而潔令陳紀相循元元久之三
尺布矣城北蒙山大盜謝甲聚數百人城西分宜界
上礮盜亦數百人久不伏法先生次第平之封肉以
安邑豪裴氏睚眦殺人無敢忤視先生發其死罪設
法捕繫論誅二人適戍一人士民快之邑人羅生淫
于劉氏已而攜資謁選舟行數日不知所終七年無
能蹤迹者先生一日論盜欲得殺羅者劉氏子本也

自寶偵羅北上夜尾其舟胙橐而沉諸江語伏遂正
爰書上官詫以爲神富人張浚有冤遇公而自以一
硯爲獻受而付之記史異日發之銀也笑曰陶泓清
士辱以朱提召浚叱還之三年政成擢爲戶部主事
旋丁外艱復補刑部先生既負時名不得一當藝苑
又出試吏僕僕對牒非其好也及入爲曹郎居多暇
日而海內名能詩字史部宗子相狀助甫兵部張肖
甫同部王元美徐子與輩素集山下先生盡興之交
朝夕倡詠期爲復古而諸子之名大譟長安稱一代
盛際矣頃之改尚寶司丞一奉使冊封德藩再供殿

試兩考陞少卿浮湛避世不干進取有以自適也而嘗以賦詩調謔得過兩吏部又嘗以受印誥兩御史御史內慙癸未大察其人皆在事共欲傷之少宰淮南李公江右朱公文爲力解弗得左遷亳州同知亳士故習怕慢先生繩之以禮師生滋不自安又嘗至廣陵坐淮陽別駕上別駕恨之適以公事至亳師生爲飛語入之別駕會先生擢寧國府同知入賀過家而江北使者猶用亳師生語傳成白簡先生因臥不出矣先生兩佐府州不鄙其官奉職甚修擊斲無諱二千石以下嚴之而賦性豪邁不能少有頽印以諧

時俗卒以見忌于是先生嘆曰嗟乎仕宦有命耳藏山之業十吾得其二三而曠六七天其假我餘年使竟厥緒此不足千古耶歸而坐臥一閣盡發藏書日夜伏讀經史百家之言鉤玄挾精毋不有所論著而于有韻之文自漢魏初唐下及近代握槓綜要如衡萬寶而鑄銖焉雅精計然策麻著飽足而不啻于用時時爲具饗客操竿擗瑟二人迭侍仰天鳴鳴樂而相志也先生爲人慷慨任俠內牧孝友外施德義賑贍貧乏惟恐不足念弟仲同芳業儒不就出秩金二百仕仲爲王家郎又爲多買田宅幾與已等終從父

四老日具饔飧養業師黃先生月給廩粟環濮野之
間所舉高年勝會施衣履而壽者幾四百人歲疫所
施藥而療者四百五十人貧不能收所施轉而而掩
者幾六十人他所助喪贖罪優恤孤獎調護故人子
弟尤不可勝紀郡人至今稱焉方先生在官所交皆
天下名流及罷更家居不通造請惟從蘇大司馬遊
及與諸郎君酬唱久之又皆先逝而東省才士邢子
愿傅伯俊輩稍得鴈行前矣晚以目青屏去聲樂遊
心玄晏著達生道人傳以自喻大指歸于知命適情
不近名利述其隱見方圓之間殆仲長公理白樂天

氏之流與先生生正德六年六月卒萬曆二十二年
六月得年八十有四所著東岱山房稿三十卷清平
閣集若干卷明雋若干卷已行于世外爲大學古本
四書各解毛詩考正春秋辨疑漢注疏臆老子本義
陰符經解五嶽志畧拾翠軒雜纂本朝安攘新編古
交編聞微錄醫家須知壹天玉鏡蓬玄雜錄泰然亭
樂府諸書藏于家論曰國朝之稱詩賦盛于嘉隆之
際吾里有兩李先生兩李先生者同時同官名相比
也其致有不同者歷下以氣骨合神湛涵萬有而發
以雄迅意常超下泉之求濮陽以才情赴調融治衆

采而出以和平力常蓄于法之中此其趣操也比以
五音歷下則軒轅之鼓素女之絃高張急節鏗錡駘
盪洞心駭耳而世不能究其變濮陽則昭華之增竇
臺之蕭肅雖和鳴龍吟凡下而世不能寫其真蓋所
謂異曲同工者與夫風會之流日經綺靡而以遺世
獨立之標振薄激積虎視千古斯爲至矣要以溫柔
敦厚不究不概嗣三百之響以考天地之中而導其
和必有繇焉悲夫作者之難也品其流別亦何容易
哉

奉訓大夫尚寶司少卿北山先生濮陽李公先

芳行狀

邢侗

常世作者率推歷下李先生是謂于鱗不知更一李
先生出濮上其齒同其居朝之日同其談藝同其所
不同歷下簡貴不睚近人而濮上伉爽敢決任俠自
豪兩人者論難過從瑕瑜不相質也迨後歷下名愈
高濮上若爲所掩乃先生修戈侍糲未一日忘于鱗
云濮上名先芳字伯承初號東岱後更北山先生生
而蚤慧又膚色玉潔也比當挽髮與在駙馬籍中父
母強行使者林君調之謂李郎濮上良佳帝以壻鄉
遺汝矣先生正色曰芳聞龍門不聞鳳簫林君內應

而奇之身罷歸例予青衿先生獨不受也再年試而
爲青衿二十舉于鄉爲第五人進上不第去而遊太
學凡三下第而遊道日廣輟負日以奇丁未舉南宮
高等授江西新喻縣新喻僻悍民俗疎闊視事大小
昧吏不知官城環虎夜闌入市蛇關寢門先生夷然
謂邑故沐猴令令其無三尺平乃陰司大盜謝某等
悉會論法又得豪牧長齋夫而笮之其所當他獄裴
仰三劉本等靡不驚佗若神邑人章浚家衆巨萬誤
爲大盜連染先生出之浚以一硯爲壽先生謂此他
山也者置之守藏不問也一日藏史白前硯實銀先

生笑曰陶泓清士辱以朱提立召浚而還之錄是新
喻之政冠冕江國卒以不善觔骸三歲得民曹亡何
祗役畱都抵舍及先尚寶大故拮据終喪北上改授
刑曹郎于時諸郎高伯宗究心經世柔粹本朝故實
爲鴻猷錄先生手所著書而言曰我思古人實獲我
心余其改慮從事乎乃輯近代一切名家詩而繕之
逾年亦成書人謂西曹雙壁名籍籍動巖廊矣居頃
之改尚寶司丞尚寶清嚴地居者往往唾手上卿先
生侮察任子如嬰兒察淺不憚乃欲甘心矣已未充
殿試受卷官已奉節冊臨德藩德藩鄉郡地州邑令

長爲負轡矢御五封輅如臨邛先生略不爲意撫中
丞萬安朱公直指襄陽劉公俱以氣調修平生驩先
生平揖而睨之餘客莫得前使事告竣陞本司少卿
壬戌再充殿試受卷官是年屬弟茂才同芳返母劉
安人就養京邸傾橐爲弟費獲需次趙府審理副母
氏悅之故事繡衣握方寸印出行部部使率赴尚寶
授受以爲常使者劉宋入先生趣受印劉宋目從行
黑衣先生曰印不足受尚寶不足交訓耶而目黑衣
爲二使者大銜之會歲大計囚中諸蜚者左其籍得
亳州同知先生自負遷人一意擊無少避回又州

孫守卽墨產用井里故莊先生以毫士屬之先生爲
立程課督其援上居閑輩滋不自安遂風校官劉某
羅他事擠先生復私淮安劉通判與謀通判卽恚先
生以州同据其上座者也先生未幾擢丞寧國見謝
眺青山而樂之聞鵲鎮鐘聲而泠泠然善也至持絮
令不詭隨人視毫無異寧二千石以下憚之用前校
官通判中傷坐臺抨竟回籍先生適在壯年毛毳無
戚容曰天其以山林奉我而以渦水之微坐進我我
奚爲不豫哉且夫藏山之業什吾得其二三而噉六
七豈吾稅駕日乎吾其蒞盟于鄉悉索郵師以與中

原合吾而足自老矣歸之又二年劉安人謝栢菴不以既艾減哀及禪撫中丞姜公薦于朝寢不報先生邑而構清平閣蓬玄洞野而營會丘臺拾翠軒草屨簪冠吟嘯其間未一日而廢酒未一日酒而廢詩書未一日詩書而廢管弦絲竹也先生生產故饒復善計然白圭之策室計錢帛谷量牛馬靡不中營乃者困與親交累笥與親交衣囊與親交財緩急與親交會祕為德于生者倪文學朱節卿趙梁人范貢士若而人為德于死者蘇尚書龔觀察邢宗義侯繼宋心而人為德于家者叔四老從弟靈寶仲升輩猶子

如杜輩從孫炳輩若而人爲德于儼者余秀仁周正
照楊仁輩若而人肺附而友朱學博周太守蘇鴻臚
蘇孝廉蘇右史藝文而友李千鱗王元美殷正甫宗
子相徐子與謝茂秦黎惟敬歐楨伯張助甫王師古
魏懋忠傅伯俊董元仲宋登春吾師東阿不佞侗相
吏而友兩御史大夫南充王公黃安耿公南大司馬
銅梁張公登州陳公一督府重慶蹇公于喁鼓吹視
柳宗元所稱先友不翅過焉先生家蓄聲伎倍鑾素
園勝履道文樞副名山請曉琵琶理類琵琶行其對
蘇八右史譚此四鴈雞大挾雅音夫沉沉而牛鳴窖

中者宮也野雉登木者角也餘可推言江東查八十
聞而伏之晚以目青盡遣侍妾曰吾駱無可賣伎有
可驅耳先生者抑白公樂天之儔與其自署達生不
虛矣所著東岱山房稿三十卷已行世外爲大學古
本四書解毛詩考正春秋辨疑漢注疏臆老子本義
解陰符經心經解五藏志畧拾翠軒雜纂十三省歌
謠本朝安攘新編古交編閨微錄明詩纂醫家須知
壺天王鏡蓬玄雜錄凡五十萬言藏于家

尚寶司少卿潘君士藻墓志銘 澹園集

自吾師天臺先生倡道東南海內士雲附景從其最知名者有蕪陰之王德孺芝城之祝無功與新安之二潘潘之字朝言者旣以絕世之姿不究其用于時以死而與吾輩遂隔大華氏爲最久當是時自天臺敎外翦出一枝則有溫陵李宏甫去華竝師而嚴事之吁其盛已去華諱士藻學者稱爲雪松先生世居婺源之桃溪家爲仕族嘉靖中少司馬珍若旦少司空希曾大司空鑑大司馬潢鼎盛一門卽崔氏之重笏累戟不足多也君父法以君貴贈如其官母胡封

太宜人君舉萬曆癸未進士少以孝友顯鄉里已以直諫顯朝廷乃仕而起起而爲符卿官禁近稱顯融矣而卒遭廼不調以劾以彼其志曾不究百一而又太宜人年餘八十子職未終宜君之不瞑以死也嗚呼痛哉君爲人磊剛有大節與人言必盡傾望而知其君子也而尤自負人倫之鑒所至必交其長者每得一人推輓之使盡其用而後已其人或顛躓瀕於危人皆引避或陰擠之什必反覆疏雪以身保其無他故君坐屢常滿朝廷之上莫不爭知去華者億君始舉進士一日過余曰余于同籍得二人問之則

遼左蕭君汝芳與沮齊君點也後二人爲郡縣錚錚
有聲皆以彊項受奇禍君又力爲牽復今二人皆知
名于朝爲賢士大夫者君力也其司理溫州也衛公承
芳爲守與他丞倖皆賢士君與之唱于唱和若填薨
然而郡事大治別駕工貧且死君賑其孤又移書學
使使祀之鄉賢祠其與人交有終始皆此類君以戊
子徵授御史巡視北城有二閹闥出官門戲良家女
婦于板者執之懼其聞而奪之去君謂若好出對簿
脫汝矣不聽君移文司禮司禮以聞上志曰東廠
職何事而事自外廷發耶命杖二閹斃其一自是請

中貴洵洵思必報而大璫職東廠者亦以故銜君矣
屬以火災陳言大璫敍摘君疏中不可使聞於左右
近習語以激怒 上謂君歸過賣直 上怒甚幾欲
杖之廷竟落三階調邊地于是得廣東布政司照磨
以去初君之被徵也晤余南都余謂君必爲諫官爲
諫官要在培植人才許與氣類無事翹翹一鳴以塞
責也君首肯余言既至都授御史君方錯綜時事莫
以次第上時鄒君爾瞻里居獨心異其不言既而聞
君衆譴乃嘆曰眞吾友也憶余方以輕擲戒君而爾
瞻以速去服君何邪雖然當是時中貴之焰未甚熾

也俟君說得行內廷果息安得驕揚博掩以豪奪吾
民至此哉乃言之未用而第收其名明乎非君意矣
辛卯始改刑部照磨爾瞻亦自銓部調至旦夕相
與講學問政意甚驩也壬辰晉南吏部主事七月改
尚寶丞君既以謫倅起爲中朝所屬目又性侃直觀
時事輒扼腕不平惟有方者始思中君故君言尚寶
久不徙獨關西李敏肅公深知君謀于冢宰孫公調
之吏部而君辭甚堅決第舉南中名流目代君前考
功郎蔣君時幹今尚寶卿劉君日升尚寶丞葉君茂
才皆矯矯推重一時其它多未易悉數方君之辭吏

部也李公曰固知公不欲然士論所爲屬公者以此君正色曰公直以不欲吏部郎知我乎李公以此益賢重君癸巳晉司少卿尋孫李踵去知君者益少丁酉秋德孺卒京邸君與余治其喪而頃之余亦以譏罷時權有力者以余故訾君益急君益爲余不平亡何其人卒敗去而君意且倦游矣庚子夏以冊封奉太宜人僑居畱都與余及無功聚首時覺君宇間有病色然議論英英猶映蔽數十人不意其遂不起也至十月二十有九日竟以疾逝嗚呼痛哉余坐疏慙見廢于時獨意君沈厚可屬大事乃哭德孺曾幾何

而無功與余又復撫君尸治君喪如德孺其可惜也已今歲宏甫以誣被逮死燕邸余既不能奮飛而相知者率陰拱而不肯援使君而在亦豈至此極也嗚呼痛哉人世浮雲須臾變滅唯知命者不憂與立德者不朽余與君其又何憾初兩先生之學人或疑其異指君獨取會心者削而用之以自名一家異域間多盛傳之者雅嗜讀書聞賢人君子之言行與時事之大者動有紀述嘗見其數鉅冊于几間君輒自掩避不欲遽傳也今行世者有閒然堂雜集詩文集周易述若干卷亦足見君之大都矣生嘉靖丁酉八月

二十五日距其卒得年六十有四配汪氏封宜人子
四師皆爲鯤泰衡兆鰥爲鯤泰衡諸生女三壻爲胡
有敬張承叙董大臨孫一嘉生師曾等以某年某月
某日葬君某山之原而丐余爲銘銘曰聖言浸遠罕
究陳世儒乘之雜僞真硜硜者流局前聞空有互聞
紛以綸疇勇如君廓其源并苞絕異昭羣昏驅除異
論如蜚蜚日月皎皎開浮雲有書載之垂無垠世如
不信砥茲文

尚寶司司丞靜菴徐公宗實墓表 黃淮

先生諱垢字宗實以字行姓徐氏其先東海鄉人宋南渡後有諱千一者爲黃巖今其子榮祖遂占籍爲黃巖人先生之曾祖也祖諱已元以子貴贈承事郎行樞密院斷事官經歷父諱存翁仕元爲浙江等處行樞密院都事母車氏贈宜人先生兄弟三人而先生居長天資穎悟勤敏好學仲弟宗茂字傳才提昆弟自相師友人知爲二難幾冠聞永嘉彭公庭堅承徽國文公正傳講學鄉校先生負笈從之游深有所領悟遂贅居永嘉以便力學年漸富而學益充負才

尚氣有經綸天下之志慕范文正公之爲人恒誦先
天下之憂而憂后天下之樂而樂之語拊几昌言曰
必如是而後可以言士矣居無何知元運告終韜光
養晦設塾授徒若將終身焉淮童壯時受業先生之
門先生剛毅嚴正約敎條爲學規若官府號令賞罰
勤怠悉當其情諸生咸知振勵洪武壬戌有司以禮
敦遣先生赴闕數被顧問敷奏剴切均中時宜高
皇帝深喜得人敕銓曹任司風紀先生以草茅愚賤
辭除銅陵簿復請歸迎母就養重忤上旨謫輸役
淮陰驛郡邑校官聞先生至爭出迎除館延致爲賓

師多所造就會朝廷選駙馬都尉功臣子胡觀在選
中慮其失教爲擇師而惟其人爰命起公比授館教
法嚴明如在鄉塾時觀受教惟謹既冠入府成禮畢
每當講授中使援他府例設駙馬位于堂中北墻下
南面而置師席于西階上東面先生憮然曰師嚴道
尊然後民知敬學豈以我一布衣而誦師道哉輒手
引駙馬位使下然後爲說書既而明日復然先生乃
爲書貽之責以在三大義及富貴驕人之說觀泣下
跪謝執弟子禮愈恭畧綺紈之習尚儒雅之風高
皇帝深喜之召見獎諭再三由是德譽日著洪武末

任蘇州府通判用薦陞兵部右侍郎兩持使節罷而復起轉尚寶司丞其判蘇州也奏發粟二十萬以活饑民當春暴水嚙隄爲患巡行郊野相視原隰大興治水之役採訪使以爲妨農且勞民沮之先生上言他役可以妨農止水不退則田不可耕妨農莫甚焉况今規令有田之家量多寡貧富人出力而饑者得所資正所謂以佚道使民曷爲勞民哉屬邑有節婦王氏郡乘載其事元末旌表未及行先生請旌之禮部以前朝事不允先生上言封比干墓非前朝事乎朝議謂其知大體皆從之其人爲侍郎也首陳十事

指切時要凡會廷臣決疑議先生是是非非歷言之
不徇私不黨同一揆于義以故多有矛盾者其出而
奉使也在兩淮多所建明政舉而民安之海州有節
婦侍小花年十六許嫁而夫亡歸夫家成喪持服養
姑送終剪髮自誓守節不二採訪使上其事所以
其年未五十不合例先生上言曰隨事處中始爲合
義守文執一豈曰得宜厥婦既能守夫於簪嫁之初
又能剪髮於葬姑之後雖刳目截耳亦無以加自當
與卓異同科豈與尋常比例廷論聽其言下郡邑旌
之使兩浙以疾惡太過被劾怡然去職其爲尚實

也年漸老而力衰伏遇

文皇帝入繼大統優待老

臣遂上疏乞骸骨許之歸家杜門謝客課子孫問耕稼逍遙林泉之下無盡餘齡以遂考終而已越二載臬司徇囚獄詞牽連逮至京得疾卒於旅邸垂絕侃然之氣不少貶是爲正月二十二日也距生之年元至正甲申壽八十有二先生平昔交游皆四方知名士慷慨豁達肝膽相照酣歌激烈分韻賦詩竟日忘倦訃音遠聞傷之者至號慟頓足歎息士林之寥落也淮於先生師生之分沒齒不忘爰表諸墓道以示後人俾有所觀感云

尚寶司司丞洛原白公悅墓碑銘 王維禎

洛原白公者常州武進人也名悅字負夫其先洛陽人後徙武進居採菱港白公不忘始故號洛原白公大父昂刑部尚書父圻都察院右副都御史其治官民皆大功德于世白公都御史之長子生而負俊才好文詞十二三時都御史與客問報札咸出其手客得札稱善以爲都御史能而不知子洛原所爲也都御史卒白公以其蔭補太學生值二年而爲嘉靖壬午白公舉順天鄉試推脩與弟又十年舉壬辰進士除戶部主事常足時白公父行皆大官皆器白公重

之而白公又好士如饑渴故所與游非其先世交則
海內知名士也白公故嘗闢關中鄠杜有王太史武
功康太史兩公者皆家居慕之乃求使入關謁兩公
兩公見白公與語大喜皆留其家數十日乃發別
而之平涼使所道望北地北地故空同李氏家而李
氏客于梁苑之白公念當世之文所能復古昔者由
李康諸人倡始顧獨不得見空同乃停輅褰帷徘徊
瞻顧有愴然之恩焉其好士如此既歸憑主客司員
外已又遷郎中復使江西乃遂登龍虎山奇之聞其
東卽武夷不遠乃卽又放舟武夷諸峯白公詞調

既逸而又善晉人書兩使還出紀游詩數十篇一時
見者未嘗不種種稱絕也白公爲人汲廓而好義與
人游其人當于已心卽解劍捐珮以贈不爲惜卽心
內所弗合亦陽浮慕之不終拒也白公以此聲名益
顯然亦以此招忌賈禍居頃之改儀制司郎中會天
子開立東宮爲置官屬詔有司選補白公補左春坊
左司直其年大駕幸承天歸而按劾從官未至者言
官中白公于是白公謫永平府通判久之轉南京後
軍都督府經歷已轉南京吏部驗封司郎中無何復
謫河間府通判復轉戶部主事又一歲改尚寶司司

水白公自登第至爲尚寶侵等二十年官不過六品而尚寶又閑曹不得有所建立恒鬱鬱不樂明年庚戌遂病其秋北虜犯京師百司震眩白公臥閣內日引賓客入與計擊胡事白公狀貌甚臞至談天下事則踴厲憤發有萬人獨往之氣自十年來棄去文詞不理時時習騎射訪燕趙少年俠客與之游人多惟之及至庚戌乃始知其非謾也白公甫弱冠也謀危白氏者蓋縱橫至白公挺身抗之卒無害則沉毅有謀自少已然非獨今也又明年辛亥病篤有詔遷司丞爲江西按察司僉事未拜俄又遭論乃遂以司丞

致仕云白公有五男子長子啟常禮部主事既且卒
起而振襟端坐謂禮部君曰吾白秦大夫乙丙之裔
也歷千百世而顯者不絕自吾上二世竝著勲名于
竹帛之間而吾卒湮沒至此度平生疊疊無覩于前
人豈固命哉小子念之其慎所爲補吾闕也語曰書
射驥絆足則我乃似之矣言已悽然遂卒是時公
配楊宜人在前諸子咸跪伏床下問家事竟不一語
及初白公游關中時余方家食未之能交也迨余官
翰林時與往來甚數則白公者固偁然有古豪士之
遺風焉不直工文詞也乃坎壈終其身吾不知造化

何以生又何以抑耶

尚賓司丞寓菴吳公性墓志銘

徐階

常之宜與其俗於吳下爲最淳其士大夫率好古而
茂朴然其所推服必曰寓菴吳公公諱性字定甫其
始爲郡庠生授徒里中修行業文動以身訓書程著
式按而行之始終相較不爽毫髮年三十七舉嘉靖
乙未進士于時仕者方喜躁競公獨則之上疏乞爲
校官得河南南陽教授南陽人鄙野而尚奇袤卽諸
生亦然公歎曰茲教之廢爲之也雖然教人者徒務
責諸人已乎榜下門盡謝問遺壺漿東脯禁不得入
已乃察其有志行者禮之資可進者諫督之婚姻喪

莽戒母計資賄用浮屠以次教之冠射諸禮士習變焉故事進士就教再期轉胄監三年選部屬公既無貴援又不以資俸自言於人積五年始遷戶部主事且南京也公意顧恒自得尚書任使其屬以摧稅爲便利筦庫爲叢劇公於次當摧揚州關稅乃得筦庫不以非序少有怨尤于心久之監浦口倉迎父及伯兄養諸官舍父子兄弟飲醴茹蔬竟日相怡悅歷員外郎中滿三載封父如其官贈母錢安人公固以母不逮養爲憾至是焚黃薦前曰吾願足矣卽引疾未幾遭父憂丁未服闋補戶部乞改南太宰四明聞公

曰是素恬於進宜有以勵士改南京禮部主客主事
踰年復請告作天真園與朋舊詠遊其中將遂終身
焉既而曰吾本以疾告于出處未明也壬子強起補
南京車駕主事未上乞致仕吏部寢所奏且促之行
不得已至南都又疏以請吏部謂公賢不宜聽其去
然又重建公仍予告丙辰以期滿至京師改尚寶司
丞公不樂再上疏乞休語／曰吾不得去不已吏部
知其意覆請從之公舉進士二十一年在官不滿二
考其慕退處甚于人之嗜進而其／去視求進者加
急雖古達人隱君無以過也爲人不尚迂談不採虛

譽常曰學無憂勤惕勵之心則恣而不敬無誠實淵
深之心則弛而不豫未有能成者也故其事親持身
治家必以禮事伯兄如父對妻子未嘗有隋容要束
僕從盡斥去蕩佚華矜之習子堦有欲藉公補博士
弟子者峻拒之曰自古至公惟取才一路吾豈敢以
干有司居家不務生殖然恒有以及人銖積寸累皆
得之儉約是以能薄利祿退無所求於世而進不辱
其身也生弘治己未十二月卒嘉靖癸亥九月年六
十五所著有詩文若干卷讀禮備忘二卷宗約族譜
家訓年譜各一卷

尚寶司司丞孟公秋墓碑

姚思仁

今學士大夫言學者皆曰齊魯復有孟子蓋謂我疆
先生云先生諱秋字子成號我疆世爲山東東平人
上世有諱通者徙居安平鎮通生鳳鳳生先生先生
生而有志慧識過人讀書通大義里師授毛詩至
桑間濮上棄去不竟學間其邑安山張公爲陽明家
言執弟子禮問業學尚書得明目達聰語灑然有悟
發憤下帷謝絕一切卽家徒壁立立寡如也會安成鄒
公善督學山東太平周公怡令臬事講學貢院得先
生大奇之曰孟生固自超也并諸生首自以爲得先

生晚庚午舉順天辛未成進士先生雖早貴絕不以
氣色臨人居京師不與流輩伍獨交驩孟公化鯉既
得昌黎令下車問疾苦誓以不父母吾民者有如日
會昌黎邊邑驛傳徭役糧馬鞭甲繁興一切爲民更
始爲之器械以備之爲之警邏以候之爲之城池以
禦之徭役則省猾吏則詰異才則拔幽隱則察公署
黷官則修掣二百年夙弊一旦苗穉而髮櫛之父老
胥相慶曰吾邑侯其斯謂古之循良也與哉其得民
之深有如此暇則進諸生三十餘人講良知學自以
俸餘館穀不費縣錢謂昌黎爲鄉先正刻韓文以眎

諸生先生心如太虛視世界浮雲毫無芥蒂雖居邊
圉繁邑未嘗一日撙講與諸生盟必先行而後文制
外以兼內講肄以端其習考覈以程其規標的以大
其業宏博以遠其思抑揚以厲其志金玉以宣其情
夏楚以鼓其氣久之士懽然若失也勃而變已翕而
從翻然而革先生忻忻曰吾教行矣又惻惻與民休
息卽不爲巧宦猶不失令名諸臺薦以十數上僅得
大理評去之日父老泣留適道時有鹿衍先生楷亦
若有戀戀者父老爲樹碑以識不忘尋從祀名宦先
生小試于邑邑皆弦歌也署廷尉兩載以廷尉天下

平獄獄惟允贈父如其官母孺人已卯轉職方領山海關是時關政久弛妙簡才望首以往奏給特勅益異數也先生至嚴譏察裁供應竟爲其司官忌遂妻莽而巧詆之辛巳以考功令調外衆論譁然先生無愠色乃乞休歸時復過昌黎昌黎士人且喜且悲渡灤江作歎歎歎與士人別泣數行下抵家十築家南二十里許尚羊其間有終焉之志日課子若徒博刺羣籍剖難析疑側弁而吟曰長林豐草吾以適吾適也自是先生道益尊賢士大夫道安平式廬詣謁于旄相望或依依數日不能去甲申以直指黃公薦起

刑部彙陞員外郎丙戌還尚寶丞公餘卽聚陽和諸
公究竟理道殆無虛日緒神先生以一領整咳爲快
已五陞本司少卿淡旬而卒嗚呼傷哉先生篤學力
行苦節清修以名儒特聞以廉吏令終治縣縣治治
獄獄理司馬馬轉司刑刑清司型型慎投之所向恢
恢乎游刃而解然本之所由來矣夫先王之學其本
以治心其緒餘以治天下國家先生事業炳當時蓋
其學之緒餘也先是先生奉命衡府便道還里撫臺
李公過先生于家凡三宿凡卡訂明儒經異是時年
已六十矣而神益王時時誦孔孟書不少衰間得聖

賢片言隻字有契于心隨筆之以示後人當昌黎入
覲時耿楚侗先生與之論心先生曰心體本自澄徹
有意克已便生翳障蓋真如的一齊現前如如而
妙自在必克復而後言仁則宣父何不以克伐仁原
憲耶謂顏子合下便是復禮其不以血肉視心以靈
源視心先生之學粹矣孟公化鯉稱其河流爲澹衡
度爲平庶幾知先生者哉所著有二明一脈明儒經
翼戰國策略昌黎文選行于世先生以五日生後贈
評事以是日卒故終身于是日不爲讌集事其兄友
愛篤至雖老且貴若不放鴈行進者享年六十五卒

之日不及殮傷哉貧也友人爲治棺具其斯爲清白
吏與不佞觀風燕魯得先生遺行文諸麗牲之石表
之日有明儒宗我疆孟先生之墓

中順大夫南京太常寺少卿掌尚寶司事夏公

瑄行狀

李東陽

公姓夏氏諱瑄字韞輝其先自衛徙饒代有顯者曾
祖諱希政元季爲湖廣行省都事兵亂死事祖諱時
敏洪武初爲湘陰教諭遂家湘陰考太師忠靖公諱
原吉歷事四朝豐功偉烈著在國史公忠靖公次子
少穎敏喜讀書嘗竊觀忠靖奏草及忠靖朝退必請
問所議事忠靖笑口是非爾所知也然心默喜之胡
公浹密夢上以櫻桃一盤賜忠靖二千長子琬避
不敢受而公獨受賜後琬卒胡公以告忠靖曰繼夏

氏者必此子也 仁廟嘗顧問忠靖曰卿子年幾何
欲以近侍官之忠靖曰臣子幼稚非食祿時俟成立
事 陛下未晚也宣德五年忠靖薨 宣廟震悼不
已卽日遣中官致命于家拜公尚寶司丞明日公與
叔父原禮入謝時公年甫十有三進退有度特賜冠
帶衣服公扶柩歸鄉里 宣廟憫公幼特免守制使
養母于官而別遣官護喪歸且厚恤其家公強記過
人太師張公輔呼爲小友少師蹇公義而下多公父
執禮重之 正統初 英廟追念忠靖勤勞特賜公
田十八頃而蠲其稅楊文敏公榮將歸謂公曰尚寶

非處君地吾還當薦君未幾楊公卒不果雲南夷逆
命公上疏乞立功自效尚書王公驥奇之欲以公往
有沮者乃已八年命署尚寶司事公以母疾乞侍養
還鄉母愈乃就職時四方多事公上疏陳七事一謂
湖廣苗本異種必有首惡糾合爲寇宜密令諸酋從
諭以利害誘以重賞使反兵相攻然後出其不意擊
之必破一謂苗出遠劫必使老弱守寨宜分兵間道
擣其巢穴則賊分而勢寡一謂北虜雖每歲朝貢但
詐難測宜令知兵者行邊旌勇智退老弱繕兵械修
城隍謹烽堠以備不虞一謂福建盜作師久無功使

賊勢日張民困轉輸不得耕食是益盜也宜督將臣
乘時殄滅多見采納十四年虜犯京師公憂憤陳四
事一謂虜乘勝遠間鋒不可當宜堅壁勿戰使進無
所得退復氣沮然後出奇設伏諸道奮擊破之必矣
一謂虜深入吾地宜令死士夜襲其營仍設伏內地
以待追者一謂虜既舉國入寇邊無所禦宜調邊兵
之半入捍京城內外夾攻彼將自潰一謂我軍依城
爲營進無死志退有所歸宜嚴號令以堅其志如以
三隊爲法前隊戰退令中隊悉斬以徇則士畏法而
不畏敵矣詔亟行之後虜使至公又言虜無故遣使

與吾譯者偕來必佯爲遜辭以緩我應援揣我進退
覘我虛實或爲誑事虛情以亂我謀或賂我譯者令
爲反間宜慎防之以觀其變又謂虜若引退宜分兵
五路間道襲之以正兵二路當其前以奇兵二路攻
其傍以伏兵一路絕其後又以宣府大同諸路邀其
歸蓋彼方恃強不虞吾至且待使回犯我而我先奪
其心勢可必破況今太陰犯昴主胡不利太白出高
用兵敢戰吉臣以爲天道人事機不可失當道不能
盡用其言公又言虜旣得利今冬來春必圖再寇今
汝寧鳳陽諸府及河徙故地流移之民無慮百萬恐

因隙而動爲患不淺願假臣便宜使招募智勇以爲
國用仍條陳事宜以爲先召吏士及其故老俾各舉
所知凡舉主及所舉勞以酒幣揭名于旗以倡忠義
然後協諭凡有知兵敢戰習騎射諳地利能爲間諜
者許以官賞復其家一丁以給其力事平之後不願
爲兵者釋之教閱之法以百人爲率擇其能者十人
以教其九十人兵集旣衆又習戰法可以捍京邑可
以消外變事下兵部尚書十公謙請試用其才侍郎
王公偉公知已也時爲監察御史亦請勅公募兵淮
揚會事定不果久之公以母老乞就養金陵

命掌

南京尚寶司事三月丁鄭夫人憂上京師復陳三事

曰賞罰以爲御將不可不嚴任吏不可不寬宜罪敗
師棄守之將以戒不忠增廉官能吏之祿以勵不任
曰去利以爲善治國者不損民以益已因舉近事以
利致害者貪虜入立致生邊患窮兵殘川以疲中國
其弊在上汚吏賣民以妨文治貪將虐兵以耗軍伍
其弊在下宜減浮費以輕徭賦省游食以足軍儲惜
民力以培邦本又謂貴州宜仍洪武舊制置行都司
罷藩臬郡縣命一良將輔以文臣儼導決於外以寧
邊患曰審機以爲制敵之機係乎攻守之得失因舉

近事之失機者虜初寇大同氣銳鋒利不當戰而與戰以致敗績一也宣府懲彼失利畏慎太過虜經其城當戰而不與戰以致土木之敗二也及虜越重關犯畿甸自納其死而我過爲防禦無所施措以致大變三也宜鑒覆轍懷遠圖揚天威以雪國耻大學士高公穀見公疏薦于朝亦不果用奉使秦府充冊封副使凡所賜遺悉不受天順二年公以疾請命掌南京尚寶司事踰月遷少卿八年賜誥命特贈所生母王氏爲夫人成化二年進爲卿時五府多闕惟都督一人公奏守衛事重非一人可任乃命四都督往更

宿衛十四年九載考最陞南京太常寺少卿仍掌尚
賓司事方圖請老歸守先墓無何疾卒未卒五日猶
力疾草疏大略言臣伏見 太宗文皇帝賜 皇太
孫勅諭皆農桑軍國爲政治民之要誠 祖宗詒謀
之至意願 陛下置諸左右覽 行之仍命 皇太
子讀誦使預知民事艱難守成不易則不必遠求諸
古而天下可治臣懷此言未敢輒上今臣病旦夕死
此而不言永無日矣命其子崇文上之訃聞 上遣
官諭祭于南京

南京太常寺少卿掌尚書事楊渠傳 實錄

楊渠字叔簡江西泰和縣人贈大師謚文貞士奇之子正統初奉命讀書內閣十年以蔭補尚寶司丞至成化間歷陞初久之上屢言尚寶司官才可用者宜以例推舉既得旨允之而竟不見舉渠不能平乞改任南京以秩滿陞太常寺少卿仍掌尚寶司事成化十九年五月卒賜祭如例渠少豪放後折節向學博涉經史能詩賦談詠疊疊不能下物在一時大臣子能文者稱渠云

南京尚寶司卿白君玠墓志銘

倪岳

君諱玠字宗璩姓白氏其先本洛陽人富宋南渡時
有諱繼昇者始遷于常占籍武進因家焉曰明遠均
寶字中君高曾祖也考希原以君貴贈承德郎戶部
主事加贈奉直大夫戶部員外郎妣錢氏初贈安人
加贈宜人君生而聰敏少喪父母落落無所依遂挾
書往金陵之句曲山寄跡朱陽館從黃冠游忽感悟
自奮乃之京師學於翰林編修徐先生文式及今閣
老徐先生之門久之大有所得補府庠博士弟子員
益刻厲問學竟領成化戊子鄉試明年試禮部賜進

出身授戶部浙江司主事主納通州軍儲以勞疾告
歸抵家踰年復起轉貴州司主事主納內庫銀絹王
辰給賞遼東邊軍往時銀積羨餘所司多侵匿君悉
歸之官癸巳南京公幹遂助理浙江諸路鹽鈔時權
貴私販累數十萬商人大沮君極力裁革人稱便焉
比還陞本司員外郎甲午夏持節充副使往湖襄封
王及妃有所賜予悉辭不受陞陝西司郎中癸卯朝
廷以運舟稍緩命君催督首責香藥綱運之爲奸弊
者其徒斂避事賴以濟山陝歉荒人相食議舉納粟
之令他如僧道度牒生員入監各以差入覈實官帑

其所出納皆君主之人稱廉公未幾有南京尚寶之命君體素瘠而才識豐瞻遇事立辨談議風生故爲時所推許性孝友自傷蚤失怙恃因名其讀書之軒曰思親示終慕之意事諸兄敬愛處友和易持身謹愆人未嘗見其過初在鄉里或嫉其新進君謙以處之旣仕貴顯益置不校人多其有容嘗買婢見其有戚容問之知其官人女也旣養以爲女釋良士配之兄弟老分俸以贍姪鯁爲郡庠生卽相俸金入官俾得援例補國子生其行義多類此君起寒砭砭嘗學無所慕乎外旣仕久始買宅于興仁坊之西凡祖

遺業悉與兄姊居之既進列卿復得南畿密通鄉邑
乃於興仁之第築圃鑿池種竹構小軒三楹榜曰隔
塵且曰吾得釋去繁劇將營菟耒老焉豈意遽止是
耶惜哉君生於宣德庚戌四月卒成化丙午四月得
年五十有七而已子一卽金郡廩生積學有文能世
其業輯君平生之作有遠行稿思親軒稿若干卷藏
於家

南京尚寶司卿許公穀傳

京學志

公名穀字仲貽父愷瀟灑有遠韻隱居嗜山水圖籍所至歷覽名勝必爲詩紀之公少承家學博證精詣已非儕偶所及嘉靖乙未舉會試第一授戶部主事留心國計梁端肅公甚重之調吏部清理吏胥條格不爲權貴所奪轉文選前是行取者候日久往日後任者率反前所舉低昂之以市私公曰此不肖之心也白冢宰許公讚亟行之許曰須覲後未晚公曰覲者叢至萬一有蜚語則行取者難爲去留矣冢宰矚公言竟以二日畢選無一外補者僉謂其公而厚云

任滿當遷請南行便將母晉貳南太常會大計調浙
江監運司副使尋晉江西提學僉事至則首以孝弟
禮義廣厲諸學官弟子校文察行一以公嚴行之人
不敢干以私然名臣後裔亦未嘗不廣詢而優錄之
也晉南尚寶卿以李給事萬寶論致仕蓋公雅負高
名時貴之官南都也其子慕而厚結之公不應及柄
國時時干預銓政格不許又以乞南還爲遠已益大
嫌之其調饒司嘆李論劾皆坐此然公以盛年巖居
閱三十載迄無一書通政府有欲列之薦剡者輒固
辭縉紳先生至南中無不過存公間投轄款留而未

嘗一謁謝有疑其簡者公曰此卿前輩里居之法某不敢變也徵文者屢滿戶外受其贄金投一竹筒中客至命探取之沽酒酣飲至達旦不寐日以賦詠自娛年八十有三自爲行述甫三日無疾而逝所著有省中外臺歸田等集行於世

焦太史編輯國朝獻徵錄卷之七十七終